

ሙሉ ጽሑፍ

ሙሉ ጽሑፍ

የክርም ስሙ



የገረገሩ

የገረገሩ ገረገሩ

የገረገሩ ገረገሩ

مَرْسَخ

منصة أدبية مسرحية إلكترونية تفاعلية مهتمة بنشر الأعمال المسرحية العربية الأصلية والمتجمة للعربية من مختلف الثقافات وترويجها عبر واجهة إبداعية متنوعة، لخلق تجربة تليقُ بمختلفة للنص المسرحي تستقطب جمهوراً أوسع، وتشجع حركات التأليف والترجمة والقراءة في العالم العربي وتفتح باباً آخر للتفاعل والنقاش المسرحي.

العنوان الأصلي للنص: (يَكْرِمُو سُو) የክርም ሰው
تم الحصول على النسخة الأصلية من النص باللغة الأمهرية من مكتبة جامعة أديس أبابا.
تاريخ النشر: 1966

نقلتها من الأمهرية إلى الإنكليزية: نافكوتي تاميرات.

ترجمة: فادي الطفيلي

تدقيق: زين صالح

تُحفظ الحقوق المعنوية للمترجمين

جميع الحقوق محفوظة لـ "مسرح أنسمبل" - 2019
مسرح أنسمبل هي جمعية مسرحية غير ربحية تهتم بتطوير واحتضان التجارب النقدية والبحثية المسرحية وتولي الاهتمام للخشبة العربية وتهدف إلى إعادة توجيه اهتمام الجمهور وتشجيع التجارب المسرحية الجديدة والقيمة.

masrahensemble.org

نُشر هذا النص بدعم من الصندوق العربي للثقافة والفنون - آفاق ومسرح أنسمبل

القسم الأول

تحت صرة أديس أبابا، تقع بلدة غولا حيث استأجر موغيس - بعد تسديده فواتير الماء والكهرباء - كوخاً يتألف من غرفة واحدة بحجم مطبخ، مقابل مبلغ ثلاثة عشر برأاً. الكوخ مبني من ورق الجرائد المغرى وكرتون الصابون طالما أن ما تسميه «حياة» هو «بيتك حتى لو دفنت فيه». صاحب الملك باشا تليلا بنى الكوخ قطعة قطعة، وألصقه بخلفية منزله. ولم يكن السبب نيتته العيش فيه في يوم من الأيام، بل لأنه فكر أنه في حال أثقلت الهموم عنق أحدهم من معدمي الحال، فإن ذاك التمس سيدفع أيضاً إلى باشا تليلا مبلغ 13 برأاً؛ فالمال ضروري جداً لعلاج من سرطان الرئة.

مع حلول الشهر الفائت مَضَتْ ثلاثة أعوام على مجيء موغيس للعيش هنا، واثنا عشر عاماً منذ توليه وظيفة حفظ السجلات في الأرشيف براتب خمسة وستين برأاً. خلال هذه الأعوام الاثني عشر، تعلّم الكثير عن الحذر وطأطأة الرأس طاعة على حساب كل ما يتعلّق بالإقبال على الحياة. موغيس في الثالثة والثلاثين من عمره. انفصل عن زوجته منذ عامين. وبسبب فورة في دمه، أصابت شيئاً يسمّونه «أعصابه»، تعرّض دماغه للمسّ بعض الشيء فنُقِل إلى مستشفى إيمانويل للأمراض النفسية. ولبث شهرين فيها. همّت زوجته في هذه الأثناء بالرحيل قبل خروجه من المستشفى، خشية صدمة تُصيب وليدها الجديد فنودى به. لكنها، ولأنّ الضغط الذي قاده إلى هذا المرض أثر عليها أيضاً، فقد كانت تنتظر بفارغ الصبر مبرراً، وتتحين الفرص كي تتخلّص منه. ما دفعها إلى المغادرة سراً وعلى الفور سرعان ما دخل المستشفى. حتّى أنها تركت رسالة تقول فيها إنّها بخير وانتهت منه ومن المنطقة القريبة من الطريق العام. هناك حيث يمكن للمرء أن يفقد صوابه إثر هدير محركات السيارات اللانهائي.

شقيق موغيس الأصغر، تيكولا، يعيش معه. وتيكولا بجسده وعقله يعيش فتوة أعوامه

مَ زَسَ حُ

الثلاثة والعشرين بالطول والعرض. مضت عشرة أيام على مجيء عمهما أبيي¹ زيرفو، حاملاً خبر وفاة أحد الأقرباء. وقد قرّر أن يُعيد لهما قطعة من أرض والدهما (مساحة غاشا²).

منذ بلوغه السابعة والستين وآتو³ زيرفو يعاني من نزيف معويّ.

يوم سبت، تُفتح الستائر ونلاحظ أنها الثامنة والربع صباحاً. نهض موغيس من الفراش وراح يغسل وجهه مستخدماً ماءً من قنينة موضوعة قرب بابه. آتو زيرفو ينام على السرير الخشبي إلى يساره. إلى جانب سريره، ثمة سكين معلقة مع غمده القديم.

الباب الأمامي للبيت يقع في جهة اليسار. ولأنّ الجدار الخلفي ملتصقٌ بمؤخرة بيت صاحب الملّك، فإنّ السقف المعدنيّ المضلعّ ينحدر على نحو يختلف عن انحدار سقف بيت صاحب الملك. سرير موغيس المعدنيّ يلتصق بهذا الجدار الخلفي ذاته. وعند حافة سريره الأمامية، فوقها مباشرة على الجدار، ثمة ثقب مفتوح مسدود ببساط قديم. حين يُفتّح هذا الثقب يجد الدخان المنبعث من بيت باشا تيلبلا طريقه إلى المنزل. على الطاولة مباشرة بعد باب المدخل، يمكن رؤية نصف قطعة خبز لا تتجاوز قيمتها خمسة وعشرين سنتاً، روايتان بوليسيتان باللغة الإنكليزية، تيرموس للمياه، موقد وعلبة أعواد ثقاب، وتحتها هناك مقعد بال، وكرسی خشبيّ وُضع عليه طبقٌ فارغ. فوق المقعد علّقت آلة كُرار⁴ عندما يدسّ تيكولا أصابعه من خلال الفراغات في أعلى الباب، يخلق فتحة يرى

1 أبيي هو لقب يطلق احتراماً على الأكبر عمراً، أكان فرداً من العائلة أم صديقاً مقرباً لها.

2 غاشا هي وحدة قياس محلية.

3 آتو تعني سيد.

4 الكرار هي فيثارة من ستة أوتار.

مَرْسَخ

من خلالها أن موغيس مستيقظ، فيقف للحظة، ثمَّ يهَمُّ على الفور مَدَّ عنقه إلى الخارج مثل ثور غير عابئ، ويمرّ متخطِّياً إياه، فيضع الطبق على الأرض، ويهبط على الكرسي، وتكون رجلاه مفتوحتين على الآخر. يبقى موغيس صامتاً كأنه لم يره.

المشهد 1

تيكولا: (هنيهة صمت، يتفخّص حذاءه): ما في ولا تلميذ بالصف السابع ما عندو صباط. في منن حتّى عندن ثلاثة أو أربع صباييط تيغَيرو... أنا، صار مارق سبع تيّام من وقت ما فختت بحصة هالنعل ونزعتلي جوز صباطي الوحيد. (يخلع فردة حذائه اليمنى ويدسّ سبابته في الثقب ما بين النعل وسقف الحذاء) هيدي هبي. بدل ما يحميني من الطرقات الوعة، خلّا أصبع إجرى يظهر ويصير عائق إضافي. بدل ما يدافع عني الصباط صار يعورني. (يعود وينتعل الحذاء ويتابع كلامه فيما ينظر إلى أصبع قدمه النافر من ثقب الحذاء) للأشخاص ليّي بدّن يكونوا عالموضة، لبس صباط مفخوت بهدلة. ما في حدا بصفنا ما عندو صباط.

موغيس: (مجففاً شعره بمنشفة، وبنبرة غير مبالية) منشان هيك عدت الصف السابع مرتين، والثالثة ع الطريق.

- وضربت أستاذك وفليت؟ (صمت مديد. قميص موغيس مصنوع من نايلون رقيق. ياقته غير مرتبة كما ربطة عنقه. يحمل معطفه الرمادي البالي وكأنه كتلة صوف قديمة. سرواله النايلون قديم لدرجة أنه يتماشى مع شكل ركبتيه حتّى في وضعيّة الوقوف، حيث يبرز عند الركبة شكل كرتين).

تيكولا: على كل حال، ما رح أقدر أنجح لَمَنْ كون الوحيد بين أصحابي ما عندي صباط.

مَزَسْ حْ

بصفنا ما حدا غيري ما عدو...

موغيس: (يقاطعه، متمتماً) عقلك يلي شاغلي بالي، مش صباطك.

(صمت مديد)

تيكولا: (ناظراً إلى السقف كمن لا يبالي)

بتعرف البنات بالمدرسة شو بسمّوا الصبيان يلي ما عندن صبايط؟

موغيس: (يبدأ بترتيب سريره) ما بدّي أعرف.

تيكولا: (متباهياً بنفسه) برأيي... برأيي...

موغيس: (مقاطعاً إيّاه) ما تبلّش جملك بـ «برأيي».

تيكولا: ليه؟

موغيس: هيك عم قلّك.

تيكولا: ليه؟

موغيس: كل شي بييدا بـ «برأيي» بحس كأّو رح يكون نقد سلبي.

تيكولا: شو هوّي النقد السلبي؟ شو هوّي؟

موغيس: (يوجّه نظرة متألمة إلى تيكولا الذي يحدق به. ويتكلّم متجهماً بعض الشيء)

انسى الموضوع وخبرني وين ئمت ليلة مبارح.

(صمت مديد)

تيكولا: (مستنعبناً بكتفه بارز العضلات ليشير إلى حيث ينام آبي زيرفو): معو هون، وين

بتتوقّع إئو كنت نايم؟ ورتليّ تختي لشخص ثاني وأنا بعدني موجود.

موغيس: بعلمي كنت تنام مراتح عالصوفا؟

مَرْسَخُ

تيكولا: الصوفا كثير ضيقة عليي. ما فيي حتى مدّ إجريي عالاخر. (يستلقي على الصوفا) شوف. بتخنقني. وأكثر من هيك، الحديد لني فيها حفر بظهري خطوط سكة. ما بترجني، وما بتخليني اتحرك، كإنها شبك ومشود عليي. (يدفع بقدميه إلى الأمام فيما يتمرغ على الصوفا).

موغيس: (ما زال متجهماً بعض الشيء) بس أنا سألتك وين قضيت ليلة مبارح، من وين جيت؟

(صمت قصير)

تيكولا: (بعد قليل من التأفف، يندفع في كلام متسارع) ليش ما قتلّو يقوم؟ ليش ما قتلّو يتركلي تختي؟

وَصَلَلْنَا الْعَمَّ يَلِي إجا يخبرنا ياه. شو يَلِي مخلبه هون؟ حَبَرْنَا إنو ابن اخت سَنَك مات، بَكينا، وَحَبَرْنَا إنو عم مرقي مات بمرض وبائي، بَكينا، وهَلَّقَ يعني صار لازم ننطرو إلو تيموت كمان؟

مش مفروض يروح؟ بيقول: أمعائي عم تنزف من الحزن. طَيَّب، نحنا مش حُبرا أحزان.

قَلُّو إنو ما معك مصاري. قَلُّو يروح. قَلُّنا لحالنا بيضل عمنا ورَحَبْنَا فيه بكل محبة. سايرناه عشر تيام. ما بيكفيّه؟ مش مفروض يروح؟ بيقُلُّنا: أرض أبوكم صارت غابة. ماشي الحال، دونم هالأرض يلي كان بور بعدو بور.

ليش ما يروح ويبعتني فيها بنفسو؟ هوي الشخص يلي بيّفهم بهالإشيا. قَلُّو إنو ما معك مصاري. متل ما هيّي، أَنَجَأَ فينا نَأْمَنَ أجار البيت، أجار التخت، الميّي، الكهريا، ووو. لازم يروح.

موغيس: (بنبرة مؤتّبة) ولا شي من يَلِي قتلّو بجواب على سؤالي، تيكولا.

مَرْسَخ

تيكولا: (تيكولا يكمل الكلام كأنه لم يسمع) يقول إنو كل أهل الضيعة يقولولو أنو يشبه تيننا. وإذا؟ شو لازم نعمل إذا يشبه البابا (أبابا)؟ البابا مات قبل ما إقدر إتعرف عليه. وبيقولو إنو لمن إنا كانت حامل فيي راح على مايتشيو⁵ وما رجح أبداً. ما بعرف إمي، ماتت قبل ما تقدر تربييني. آمين.

(في الخلفية يسمع سعال أتو تليلا)

وبالنسبة لهيدا، بعتمد إنو بس يصير وقت الأجار بتتحرك معو السعلة. أجار الشهر الماضي ما اندفع وسمعتو عم بيهدد بانو رح يجيب دعم من المنطقة الخامسة وبعده ما دفعتلو؟

(موغيس يستلقي على مسند السرير الخلفي فيما يتابع بنبرته المؤنبة)

بيقول إنو تيننا كان الشخص الوحيد بعيلتنا يلي بيعرف قيمة الأرض. وبيقول إنو كان أكثر فلاح محسود بالمنطقة. طيب شو لازم نعمل يعني؟ لاء طيب عنجد، شو بدو يانا نعمل بها معلومة؟ بيقول إنو أصوات السيارات عم تعملو كوابيس، طيب ليش ما بيروح؟! قال إنو كان موجود، راح على مستشفى سان بول، بيقول إنو قالولو يرجع تيتعالج من القرحة، صار رايح جايي إلو عشر تيام، طيب ليش ما تحسن؟ بيقول إنو تيننا كان بطل معركة مايتشيو*، وكان رجال مسيحي حقيقي وبيخاف الله، وفلاح آدمي، وإنو لازم نعتبرو مثلنا الأعلى، بس كيف بيعرف إنو نحنا مش هيك من الأساس؟ كيف بيعرف!

موغيس: (صبره ينفد وصوته يتحول تماماً إلى الغضب)

عم قلك خبيري وين نمث ليلة مبارح!!

تيكولا:

(حنقه أعظم من تفاجؤه. هو في حالة غيظ شديد. حيرته تجعله ينتفض. يتصرف كأنه

⁵ مايتشيو: موقع معركة حدثت بين الأثيوبيين والطيالان خلال الحرب الإيطالية - الحبشية.

مَ رَسَخ

سينهض ويذهب. لكنّه سرعان ما يعود ويجلس ويخدش الأرض بكعب حذائه مثل كلب مُعاقِبٍ ومن ثمّ بصوتٍ ينفجر بشهيق كان مكتوماً):

الدّ.. الدّوا معك شي؟

موغيس: أي دوا؟

تيكولا: البينيسيلين.

موغيس: بي... بينيسيلين؟

تيكولا: (صارخاً فيما دموعه تنهمر) إيه، بينيسيلين! البنكرياس عمّ بيوجّعني. سألتني وين قضيت ليلة مبارح، مش هيك؟ وين مفكّرني قضيتا! (بعد برهة من الصمت، يبدأ موغيس، مصدوماً، بالبحث في جميع جيوبه. من الجيب الداخلي في سترته يَسْتَلُّ محفظة بلاستيكيّة. يفتحها ويجدها فارغة. فيعبث بها إلى أن تسقط منها صورة وحيدة. يُعيد المحفظة إلى جيب سترته ويبحث في جيب بنطاله حيث يجد ورقة نقد مطويّة ما هي إلا برّ واحد، يعطيها لتيكولا باستعجال. تيكولا يأخذها بسرعة ويضعها في جيب بنطاله، تبقى قليلاً في قبضته، ثم يخرج بخفّة. موغيس يجلس، يثبت نظره، شارد الذهن).

موغيس: (متكناً على حافة سريره، خافضاً رأسه ومتمتماً ببطء بينه وبين نفسه) لمن كنت زغير، وبعد موت بابا، كلّما كانت إمي تبهدلني، كانت تهديّ صوتا لمن تقول «موغيس». مو— غيس، إذا طلع بوجك شي يعيقك، روق، ما تجرّب تحاربو، هيك كانت تقول.

خيّي من النوع يليّ ما بيقدر يعطيك نصيحة، المسخرة هيّي الشي الوحيد يليّ بيعرف يعملو. وهويّ من النوع يليّ ما بيناقش، بس بيستفزّ. تيكولا ما بيقيس مشاعرو من خلال يليّ بيقولوه الناس، بيقيسها بقوة تصادم السيّارات، بقوة حوافر الخيل، وزُعيق زمامير الشرطة.

(ينظر إلى الأعلى من حيث يجلس ويتأمّل بالسقف)

مَ رَسَخ

هلقي هيدا هوّي سبب إيمانو بالتهجم بدل التفهّم؟ سبب إيمانو بالبينيسيلين بدل مغفرة الله؟ لَمَنْ حدا يقول، «وقّف يا تيكولا»، يّفور غضبو وكأّو هالشخص دفشو، ما حذّرو. حتّى إنّو بيزعل وبينجرج بالتصرّف يّليّ عملو. تماماً مثل ما خُنفس الضو بيجذبو الضو وبيعلق فيه، هيك خيّي بتحيرّو الإشي اللّمّيعة وبضيّع حالو. (يسمع سعال آتو تيليلّا خلفه منبعثاً من البيت)

(صمت للحظات. ينهض عن حافة السرير ويتقدّم إلى وسط الغرفة). قبل ما تتركني تيهوناي، قبل ما تفلّ مرتي، قبل ما تقرّر إيّي مجنون وتتخلّى عنيّ... وقت لكنت عم اشتغل بعرق جبيني، لأنّو بعد ما كان عنّا بيت من لواح تنك، بيكفي إبنّا وبيكفيينا... لحدّ هلقي مرارتيّ ما إلها حدود بس بعدي ما فقدت الأمل... هلّق ما عدت عم كافح ليصير عندي بيت، كلّ يّليّ عم بعملو هوّي محاولة حتى ما إيأس... صحيح، كلّ طموحي ما عادو إيّي إيني حالي، أكثر من إنو إمسك بالأمل وهيدا كلّ شي. وحتىّ لو بتفقع مرارتيّ بتدّكر يّليّ علّمتني ياه إيّي وبقول لحالي، «موغيس خلص».

إيه، وأنا عم بنتبه، وأنا عم علّم حالي، بقول لنفسي.. بقول لحالي إنّو لازم روق! (بنبرة صوت ملؤها المرارة) بس تيكولا رغم هالشي بيقول «النسوان وشغلة البال بكلام الناس بيئدوك إذا بتعطيهم قيمة كبيرة، إذا كلّ ما العالم اسودّ بوجك، بتفتش بحالك عن عيوب مش موجودة فيك أصلاً، بيّين إنّو العالم عم يلعب فيك، والطريقة الوحيدة لتنتصر هيّي إنّو تثبت بأرضك وتقاتل». بس أنا قلت لنفسي، قتلّو، «خلص يا موغيس»، عيطت عليه تيهدا. يقوا، لحتّي يروق، لحتّي يكون جدّي، لحتّي يهدا، ويكون مرکز، هيك قتلّو. حتّى لو بطلّت شايف غير المرارة ما تفقد الأمل، قتلّو. «يا موغيس»، قتلّو.

(سعال آتو تيليلّا صار يعلو أكثر. وكلام موغيس لنفسه يستمرّ على نحو هادئ)

مَنْ قتلّا إنّو اسم إبنّا لازم يكون يّيتنا (فليكن قويّاً)، أصرتّ على إنّا ما بتقبل أسامي غير «ديغافاي» (مؤازرتي)، «ميكوراي» (فخري)، «كنداي» (يدي اليمنى). قالتلي،

مَ رَسَخْ

عديتُو نجومو واسم «بيتنا» ما ظهر. ولمن قلتَلَا: مش أحسن على الأقل نسَميه «بيتنا» قبل «ديغافاي»؟ بكلِّ عِنْدَ قَالَت: لاء. وبنفس الليلة لمن قالولي أنت مجنون ونيموني بمستشفى إيمانويل، هي أَخَدِتْ إِنبْنَا وَهَرَبِت. بس الحكيم قَلِي مرضك هُوِيْ أَعْصَابِك. قَلِي شرايين دَمَكْ م - مِخْتَقِنِي، م - مِلْتَهَبِي، م - محتقني. لمن رجعت عالبيت تاني يوم، ابني وتيهوناي ما كانوا هونيك. وَحْتِيْ ما فَتَشْ عليها، وَحْتِيْ ما إِبْعَتْ حدَا من قَبْلِيْ يفتش عليها، أَنْصَلِتْ بدير وَخَلْتَهْمْ يحرموني رسمياً من إِنُو قوم بأي شي. الجيران دارولي ضهرن، الولاد صاروا يَأْشُرُوا عَلَيِّيْ بالإصبع، الصحاب صاروا يحكوا عَنِّيْ بقفا ضهري، لَحْتِيْ حبست حالي بغرفتي، إَجْرَحْ الأَرْض، عَانَقْ الحيطان، إِدْفِنْ صوتي، وإبكي بمرارة. وحدو تيكولا وقف حَدِيْ. حَسِيْتْ إِنُو حَتِيْ اللهُ تَخَلَّا عَنِّيْ. حَسِيْتْ حالي مكشوف. بس تيكولا قال «ما شي الحال يا غاشاي»⁶ ومع هيدا، من هداك الوقت لهلأ، كانت رُوحو ملسوعة أَكْثَرْ من رُوحِيْ بَرِغْبَة النار، وصار، أَكْثَرْ مَنِّيْ حَتِيْ، يخاف من الناس، ويتجَبَّنْ. قال إِنُو الناس وحوش شرسة وَتَحَوَّلْ هُوِيْ لُوحْش متلن. ت - تيكولا... (يستيقظ من غيبوبته عندما يطلق المعملُ في منطقتهم صوتَ المنبّه الكهربائي معلناً الساعة التاسعة صباحاً. عندما ينظر إلى ساعته المعلقة، يلاحظ أنها توقفت. يُسَوِّيْ قَمِيصَه المَجْعَد، ويلقي نظرة سريعة على نفسه في المرآة المعلقة فوق سريره، ويسرع إلى الباب. ينظر إلى السيرير حيث ينام زيرفو ويهدوء يكشف وجهه المُعْطَى بالملاءة) آبيي، آبيي، آبيي، فيق، فيق، الوقت تأخُر. في ترويقة صغيرة إلك على الطاولة. فيق، الوقت تأخُر.

(يغادر مسرعاً. فيما زيرفو يستيقظ مصدرراً الكثير من الزفير والتتاؤب والتمطّي، يسمع في الخلفية الهدير المتعالي لمحركات السيارات وسعال تيلبلا).

زيرفو: (يتناول آبيي زيرفو سرواله القصير المعلق في أعلى السيرير ويرتديه فيما لا يزال تحت الغطاء. ويتلو، بحسب ما اعتاد، بعضاً من الصلوات التي حفظها. ويتشكى، متمتماً مصلياً): ثَبْتَنِيْ بِالْحَق، ثَبْتَنِيْ بِالْحَق، ثَبْتَنِيْ بِالْحَق، يا رب، يا رب، ما تخَلِينَا نَامْ جوعانين،

6 غاشاي هو تعبير للاحترام عند التكلم مع شخص من أفراد العائلة الأكبر عمراً، مثل عمّ أو خال.

مَرْسَخ

بعثنا السلام، ثَبَّتْنَا بالحق، باسم ابن الله، بحق الروح القدس، أنت أعلم العالمين، أنت أعلم العالمين، أنت أعلم العالمين (... هازأً رأسه متثائباً، ثمّ متشكّياً بحزن) شو هل الكابوس، شو هل الكابوس، هيك راسي بدو يضل على طول مشغول بالكوابيس؟ هالشي مش ممكن يتسمّى نوم. من السيارات، للزمامير، لأصوات الناس، لأصوات البارات، والإشيا يلي ما بتخلص، كوابيس كتيرة، كوابيس ما بتنعّد، الواحد مش ممكن يسمّي هالشي نوم. (مؤدّيًا حركات رياضية، ومرتدياً قميصاً ضيقاً بأكمام طويلة، يعود إلى نبرة الصلاة): أنت أعلم العالمين، أنت أعلم العالمين، أنت، الرب خالق الأرض والسماوات بلا عمد ترفعها، سماع صلاتنا، سماع صلاتنا، ربّ نينوي، ربّ نيبيليسي وسابا، وباليام، سماع صلاتنا، سماع صلاتنا، سماع صلاتنا، الرب يلي خلّص أيوب من بطن الحوت، ودانييل من عرين الأسود، وطّلع أليعازر من القبر، اغفرلنا، اغفرلنا، اغفرلنا، يا ابن الله، اغفرلنا يا مسيح، اغفرلنا يا مخلص العالم، اغفرلنا، اغفرلنا.

(يبيصق في راحتي يديه، يفرك وجهه بيديه، ويتمطّي، ينهض من سريره، يطرح الغايي⁷ عن كتفيه، متقدّماً خطوة إلى الأمام، وفجأة يضع يديه على معدته ويقف كأنه تلقّى طعنة. وبعد هنيهة، عندما يستعيد أنفاسه، يتكلّم بهرارة):

يا مسيح، خَلِّصْ، خَلِّصْ هَلِّقْ! خَلِّصْ، يا ابن مريم، خَلِّصْ هَلِّقْ! حاجة تعدّب هالجسد!
وقّف عادتك بضرب الناس بالقرحة! عم قلّك خَلِّصْ يا ابن مريم. من وين جبتلي هالوجع
يَلِّي بعقدّ المصران وبغرّقني بالعرق!

(ينحني بتناقل ويتناول القنينة التي اغتسل منها موغيس، وبشراهة يمعن النظر في الماء القليل الباقي بقعرها):

هيذا ما بيكفي لغرغرّمي، مش مهم غسّل إيديي. آخ من حياة المدينة! هيدي حياة
هيدي!؟

7 ثوب شيفون مصنوع يدويًا وله أربع طبقات، يُرتدى فوق الكتفين والجزء العلوي من الجسد، كما يُستخدم أحيانًا كغطاء.

مَ رَسَ حَ

(بعد ترطيب يديه قليلاً وفرك عينيه بإصبعين من أصابعه، يرتشف المياه الباقية ويمضض فمه مرتين، باصقاً المياه في أسفل الجدار وقائلاً باستهزاء): هلق عنجد هيدي حياة؟

(بعد أن يعيد القنينة إلى موضعها ويعاود الوقوف، يمكس معدته بيديه متألماً ويبقى على هذه الحال. يستعيد أنفاسه على الفور، ويقول بهمارة): يا ابن مريم خَلَصْ، خَلَصْ. وقَّف معاملتك إلي بهالسوء. ما تختبرني وتحبسني هون..

(يتثأب، فيما طرف ثوب الغايي الذي ينسدل على كتفيه يلامس الأرض، يتوجّه نحو الطاولة حيث قطعة الخبز الملفوفة بالورق، فيتناولها، وبسرعة يتصرف كأنه سيأخذ قطعة خبز ويأكلها، بخوف وتردد، لكنه يُرجع يده وبنبرة ملؤها الشكّ يردد): معقول هلق يكون وقت صيام! يقولوا أنو بيخبزوه مع بيض.

(نسمع سعال تليلاً. يرفع زيرفو صوته بعبارة تحية). كيف كانت نومتك؟ الله يشفيك ويرزقك برحمتو! (خافضاً صوته): بعتمد إنو ما سمعني. (ينظر إلى الخبز بعينين فارغتين لكنه بعد ذلك يستجمع قواه ويندفع نحو الطاولة) كأنو هالشي رح يخلّيني ارتكب خطيئة! بقولوا إنو بيخبزوه مع بيض! (يتحرك نحو السرير ساخطاً ويسحب من تحت اللحاف علبة رصاص وحزام رصاص يبدو مهترئاً وعتيقاً) عنجد بقدر سمّي هالشي حياة؟ أرض بيون الساحرة بلعتها الغابات! ولادو بلعتن بنايات المدينة المتبيسة! هلق عنجد، معقول هيدي تكون الحياة يلي الله بيحبها؟ (يتناول عن الأرض كشاشة البرغش المصنوعة من ذيل حصان والتي كانت قد سقطت قرب سريره عندما أراد أن يقف مجدداً) عم ترفضني يا ربي؟ عم ترفضني يا ابن مريم؟ كل يوم بروح على مستشفى السان بول وبتشكوك بالأبر. وفوق كل هيدا، الحبوب يلي لازم أخذها، أنواعها، ألوانها، كمياتها، أعدادها المحددة! آخ! خَلَصْ، يا ابن مريم خَلَصْ. (يضع كشاشة البرغش عند الطرف الأمامي لسريره. وبعد أن يمدّ برنسه⁸ على سريره ويرتبّه، يستلقي متكوراً على نفسه،

8 رداء خفيف من قماش وشاش خيطاً معاً في قطعة واحدة، يرتديه الأثيوبيون الريفيون.

مَ رَسَخْ

وبصوت خفيض أعياء التعب والنعاس يردد): إفففففففف... يا مسيح ليش ما بتبطل
تحاول تخلّص منّي بقرحة هالمصارين هاي؟ ليش ما بتفك أسري وتبطل تجربني يا رب؟
ليش ما بتوقّف محاولات قتلي بهالغضب لبي بيوجّع، يا ابن مريم. القوايا كانوا يموتوا
بالرصاص، ليش نسيّني كل هالفترة وبعدها اخترتلي هالقدر بدل الرصاص؟ (يُسمع
سعال تليلا. برّماً، يتمدّد على السرير. وبعد برهة صمت، يطل تيكولا فاتحاً الباب
ويدخل...)

تيكولا: (واقفاً عند طرف سرير زيرفو، متكلماً بصوت عالٍ): آبيي زيرفو! آبيي زيرفو!
(زيرفو يستيقظ مرعوباً، ويستعين بذراعه الأيمن كي يتكئ على وسادته) صار وقت الإبرة،
روح عالمستشفى لتاخذ العلاج.

زيرفو: (بعد استيقاظه المفاجئ) إيه؟

تيكولا: صار وقت إبرتك، عم قلّك قوم وروح!

زيرفو: (كأنّه يحاول إظهار أنّه فهم) إمممم...

تيكولا: (يتوجّه إلى قنينة الماء ويتناولها وعندما يلاحظ أنّ الماء الذي فيها لا يكفيه كي
يبلغ حبوبه، يلقيها على الأرض ويأخذ الحبوب بلا ماء. ويستدير نحو زيرفو) شو فيقتك؟
(أخذاً وقلبه) يوم السبت الأسبوع الماضي كنت بسينما «أدوا»¹⁰

زيرفو: (لم يفهم) وين؟

تيكولا: بـ «أدوا»! شو الهيئة ما بتعرف شي عن السينما! ... البطل كان مسطح متلك وعم
يرتاح. إلفيس لعب دور البطولة! وبـ «أدوا» الأسبوع الماضي ما كان معو غيتارو. بدل
الغيتار كان معو فردين «كولت» على يمينو وعلى يسارو. عدوّه ما شافو. (وهو يتدكّر،

⁹ تعبير يشير إلى الاستلقاء للراحة، بعد يوم طويل من العمل مثلاً، تعود إلى البيت وتستلقي على مقعد مريح وتطلق صوتاً من القلب: «إفففففففف!»

¹⁰ صالة سينما اسمها يستذكر اسم منطقة شهدت معركة تاريخية بين الأثيوبيين والإيطاليين

مَ رَسَ حَ

راح يقلّد ما شاهد على نحو ملؤه الحماسة) عدوّه كان ريكاردو مونتالبان. هالزلمة ولا مرّة حبيتو، كل ما شوفو بيحرقصني. خلّاني حسّ بالقرف شي إنّو طلّ من الشباك! حتّى قبل هيك حسيت بنفور مئو. لمن طلّ وفات، إلفيس طفاً الأضويبي وفوراً راح عالتخت. كان عدوّه محشّش. حسّ بالخوف. فقد شجاعته. بلّش يرجف. ولمن اندفع بعصيّة، رافع الفرد، صار يُخْبَطُ بالطاولة والكرسي. وكل ما يسمع صوت كان يتفركش، وبعدها يقوّص، كان يرجف وبعدها يقوّص، حتّى بالآخر بطلّ معو رصاص. وفجأة بطلّنا صَوًّا الأضويبي!

وين بدو يروح الحقيّر؟ ولمن إلفيس شافو واقف هونيك ومّو مفتوح، سحب الفرد المعلّق على خصرو اليسار ورماه لريكاردو. قَلَو تَيْلَمُو! وهو متوتّر، متردّد، عم يرجف، انحنى ريكاردو تَيْلَمُو. وإلفيس إيديه على خصرو، نظرو بكل احترام. سبق وقَلَو لمُو! وشي لمّ الفرد وبرمو، تيجرّب يصوّب ويقوّصو، سحب إلفيس الفرد يليّ على خصرو اليمين، بلمح البرق، وقوّصو وصلبو إيدو، وخلاه يوقّع الفرد! وهويّ عم يرجف وينزل مئو الدم، ضبّ إلفيس فردو ورجّعو على خصرو اليسار، وقَلَو «اعترف». خلّا ريكاردو يعترف، خلاه يثرثر، ويفقع، ولمن اكتفى، وشبع مسخرة عليه، تطلّع فيه إلفيس وعيونو عم تلمع ودار ضهرو وراح وتركو. وبشارطك إنّو لمن وطّى تيلم الفرد عن الأرض، شاف إلفيس خيالو، دار بسرعة، وقوّصو رصاصة ورا الثانية، بجينيو، وبصدرو، حتّى بالآخر قلب على وجّو. ولمن وقف فوق جثتو، انحنى شوي شوي وعلى مهلو أخذ الفرد يلي كان واقف والفرد يلي بايدو، وبعد ما برمهن على صابيعو مثل خيطان القطن، رجّعهن برواق على خصرو اليمين واليسار. وشوي شوي، هويّ وعم يصقّر ويبتسم، ضهر... وبعدها طبع بوسة المنتصر على معدن الفرد الحلو، وركبّ على حصانو وانطلق.

زيرفو: (ما زال غير فاهم لما يحصل) يعني مين هيدا؟ كفيّ.

تيكولا: (بغضب) إلفيس! ... بلمرّة ما بتفهم بالسينما؟ (وبعد صمت قصير، كأنه يمزح) فيقتك من النوم؟

زيرفو: إيه؟

مَ زَسَ حَ

تيكولا: فيقتك من النوم أو لاء؟

زيرفو: (بسماحة) أوه، ما في شي، ما تعتل هم.

تيكولا: (انتقل على الفور إلى مزاج الاستهزاء) ما تعتل هم، ما تعتل هم، ما - ممم - ممم - ممم - ممم - ممم. ما تعتل هم ما - ممم - ممم - ممم - ممم. ما في شي ما بيقدر الشخص يعملو، ها ها ها ها ها! ما في شي ما بيقدر الشخص يعملو، ترا - را - را - را - را - رم!

زيرفو: خيك قضى الليل كلو عم يتحزر وين معقول تكون ومشغول بالو عليك!

تيكولا: (مزاج مرح) عنجد؟ ... تا - را - را - را - را - رم - تا - تم - ترا - را!

زيرفو: عنجد. (يضع يده عليه لاهماً) خبزي، شو كانت هالحنة يلي أخذتها قبل؟

تيكولا: بسموها دوا لوجع الراس، ما بتفيدك للقرحة... غسلت وجك؟ تا - را - را - را - رم، تا - را - را!

زيرفو: إيه، طيب، لازم تسمع شو بيقولوك.

تيكولا: تروقت؟ (يتوقف عن الرقص وعن دندنة لحن أغنيته، يتناول الخبز ويأخذ قضمة)

زيرفو: آه لاء، ما كان عبالى. (بعد صمت قصير) وعلى كل حال، هيدا ممكن يكون من الخبز يلي بيخبزه بالبيض. شو فيي قللك!

تيكولا: إيه، شو فيي قللك، شو فيي قللك، شو فيي قللك. (يتكلم بسرعة على نحو هازئ) البيض، الزيت، الدسم، العرق، الوسخ، شو فيي قللك، شو فيي قللك! منّا وصفة طبّاخ عبقري! منّا خبزة طبّاخ عبقري! وفوق هيدا وكلو، الخبز، الكعك، وخبز المرقوق، المعكرونى، والباستا، والأهميت (ثريد رقيق للأكل) كلون انعرضوا وأنشروا من السوق. من

مَرْسَخْ

وقت ما نجابوا من السوق لوقت ما وصلوا، الطباخ العبقري ما لمسهن! الحبوب، النبت
يلي بينمي من البزور يَلِّي نثرتها العصافير، بيطلعوا من الأرض، بيتحولوا لطحين، بينخبزوا،
وبيصيروا فتّة (ثريد، عصيدة)! آه، شو فيّي خبرك! (خافضاً صوته، ويلتفت على نحو
مفاجئ إلى زيرفو) عجبك فرشتي؟

زيرفو: إه؟

تيكولا: عجبك فرشتي؟!

زيرفو: (مفكراً) إمممم... إيه، إيه، كنت مرتاح، فعلاً فرشة غير شكل... بس بتعرف،
قلتو لخيّك إنو - هاي شو بتقولوها - الكرسي يَلِّي إلها إيدين تمام وبتكفّيني.

تيكولا: (يعترض بنبرة مهذّبة ومستهزئة) هيدا الشي مش مقبول! شو! ليش حتّى نعمل
هيك! هيدا شي ما بينعمل! لمّا بكون أنا، إبنك، هون؟ ما تخليّ دينة الشيطان تسمع
هيك شي! ما بتعرف إنو أنا إبنك! مش بيقولوا إنو «ابن الأخ، حتّى لو ما كنت بيّو،
هوّي إبنك»؟ ممكن تاخذ إنت التخت وأنا بنام على الكرسي. غير هيك بيكون خطيئة!
كيف ممكن نعمل هالشي؟ شو ممكن يكون أسوء من هيك! ... عم تتعوّد على ضجة
السيّارات؟

زيرفو: إه؟

تيكولا: عم تتعوّد على الضجة؟!

زيرفو: ما عم تزعجني. ماشي الحال، ما عم تزعجني أبداً.

تيكولا: إيه، ما بتزعج أبداً، الواحد فيه يتعوّد عليها. ما في شي الواحد مش ممكن يتعوّد
عليه. (يُخرج عقب سيكارة من جيب قميصه، يشعلها بعود ثقاب، وفيما يدخنها) كنت
بصنّفك سيكارة بس بعدك مش معوّد عليها! (برهة صمت. ينظران إلى بعضهما البعض
من الأسفل إلى الأعلى. يخفض زيرفو رأسه بعد تحديقه). شو، في شي كان بدك تخبرني

مَ رَسَ حُ

ياه؟ ...إيه؟

زيرفو: (متردداً) آه لاء، ما في شي أبداً.

تيكولا: أوه؟ ...

زيرفو: كان في شي بس هلاً نسيتمو.

تيكولا: أنت كمان بتنسى؟ كنت مفكر إنو خيبي وحدو يلي بينسى الإشي. مشكلة خيبي هيبي كيف بينسى الإشي. سامع بشي مرض إسمو الأعصاب؟ بيقلولوا إنو سببو تشننج الشرايين. لمن بتشننج خلایا دمك، راسك كمان بيتشننج، و لمن بيتشننج راسك، عقلك بيتشننج كمان، و لمن بيتشننج عقلك بتصير تجن شوي، و لمن بتجن شوي... الوضع بصير سيئ. خيبي كان مجنون. كان وبعده. بين كل فترة وفترة بيصير معو كريزا قويّة. مرّة لمن أستاذ ضربني، سألني، ليش دافعت عن حالك؟ لمن طردوني من المدرسة، سألني، ليش تركت المدرسة؟ من وقت ما مرتو أخذت إبنها وتركتو، تغيّر كثير. هَرَبْتُ وصارت خادمة بيت دعاة. وبيقولوا إنو إختنا هيبي يلي دبرتلها هالشغل. ليش، لأنو أختنا قضت عمرها عاهرة وكبرت مع هالشغلة. بس أحوالها مش كثير منيحة... هيداك يوم رُحْتُ حتّى تتدّين مصاري منها لتدفع أجرة علاجك وردّتك فاضي، مش هيك؟ ومَرْتُ خيبي تقريباً متلها. مش كمان رحلت لعندها وقتلتها إنكن عيلة وحدة؟ وكمان دارتلك زهرا. ما في حدا إلّا وبردك خايب! ما شي الحال، حتّى إنو ما بيقدر يقرب منها. بالقانون وبالدين حرّمت عليه يقرب من مطرح ما هيبي عايشة. بس بعدو بيروح بالسّر تيشوفها ويشوف إبنو. ومع هيك، تغيّر كثير. (يخفض صوته وعلى نحو مفاجئ، يلتفت إلى زيرفو) أمهتين رح تروح؟

زيرفو: روح لوين؟ ... المستشفى؟

تيكولا: (يستشيط غضباً) لوين بتروح غير عالمستشفى! (صمت للحظات. ينظر زيرفو إليه لكن عندما تلتقي أعينهما، يعاودان النظر إلى الأسفل) شو، في شي بدك تخبرني ياه؟

مَرْسَخ

زيرفو: (متردداً) آه لاء، ما في شي أبدأ...

تيكولا: أوه؟

زيرفو: فكّرت بشي بس هلاً نسيتو.

تيكولا: (منتقلاً بسرعة إلى الحديث عن أخيه ومنتفضاً، يتكلّم على نحوٍ سريع): سبق وخرّتك إنو مشكلة خبيّ كمان هي كيف بينسى الإشي. ذاكرتو عم تنقص وتنقص، كأنو شي حرامي عم يسرقها وما رح يخليّ منها شي. (عندما يلتفت يلمح الصورة التي سقطت من محفظة موغيس ويذهب ليلتقطها. وينظر إليها) مثلاً هاي الصورة يليّ طارت من جزدانو، من جيبه كبوتو الجوانية، ما كان ينساها أبدأ من قبل. بس هلاً ليك، وقّعها وتركها وراه. ما سبق وتخلّى عنها من قبل. هاي صورة ابنو. وبيقولولي حتّى لمن يبيكون بالشغل، يبتلعها وما برجعها إلا بعد ما يكون مضى وقت وهو عم يطلع فيها. وأحياناً لمن يبيكون بالتخت، بيقضي الليل كلّو حامل الصورة وعم بيواسيها مثل كأنها شي مخلوق. إذا سمعتو عم يحكي مع قطعة ورق، فيك ما تقول إنو مش مغير؟ (عندما يمدّ زيرفو يده، يرمي تيكولا الصورة على السرير كي يلتقطها، ويبقى متملماً ويكمل كلامه). غالباً ببيكون هلاً نازل تفتيش بين الوراق بمكتبو، تبحاول يلاقي هالصورة. أنا خيو وما قدر يربيني، ورغم هالشي راح جاب ولد ثاني ومسكين صارت هلاً حالته تعيسة. وفوق كل هالشي.. بدو ياني إمشي مفشكل لابس هالصباط المفقوت.

زيرفو: (بعد أن قرّب صورة الطفل مندهشاً بها) اسم الله! اسم الله! اسم الله! (يعود تيكولا وينظر إليه، مستوضحاً ما وجد) هيدا ولد! هيدا ولد! (ييصق على الصورة¹¹) الله يعيشك ويطولك! طالع كأتو بيّك، شفت! طالع بيشبه بيو لموغيس بالصورة يليّ عم بتفّ فيها، مش هيك؟

11 بعض البصقات الصغيرة يقصد بها البركة، فإذا كان أحدهم مثلاً سينطلق في رحلة خطيرة، فإن أهله ييصقون عليه بسرعة كي يحيطوه بالبركة ودعاءً له باجتياز كلّ الصعوبات.

مَرْسَخ

تيكولا: (بعد صمت قليل، وبنبرة ممازحة) والله؟

زيرفو: شايف رموشو كيف نازلين؟ وچو كيف عم بيتسم؟ كإئو بيك قام من الموت.

تيكولا: (باستهزاء) آها؟

زيرفو: وكيف! (ينظر إلى الصورة مرّة أخرى) وكيف! (ويغرق على الفور في حلم يقظة) بيك كان رجال عظيم. وكان كمان فلاح بتحسدو المنطقة كلها. كان بيك فلاح ممتاز، بيحبّ الزراعة وقطف المواسم والحصاد. وفوق هيدا كلّو، كان محارب بينتصر على كل المحاربين، بطل ولا كلّ الأبطال. لئن كان يقول «مين أنت، لئن أنا، بكون خادم الإمبراطور»، والعبسة فوق جبينو، بتصيبك الرجفة وتتمنى تشقّ الأرض وتبلعك. وحتّى قبل ما إضعف كثير، من يوم ما كنت أنصح، كانت بعدها قامتو أضخم من قامتي، ورغم إئو كتافو كانوا مثل كتافك، بس كان فيهن عظمة. لئن الأباطور مينليك كان عم يستعد للانطلاق للحرب بـ «أدوا» وعطى تعليماتو، بيقولوا، «اقرعوا الطبول! احزموا أغراضكم! حملوا حميركم بالمؤن! أفلّعوا عن عاداتكم السيئة!» - بهيداك الوقت كنت شي إئي مفطوم عن الرضاعة، كان هوّي بعدو صغير على النسوان - وبذكر كمان مثل كإئو بحلم، كيف خيّي طلب يروح عالرب مع بيّنا. وبوقت معركة مايتشو، كئنا صرنا جاهزين لناخذ دورنا. مشينا على صوت حافر الحمار، على يمين ويسار بيّنا، أنا حامل سلاح آبابا، وهوّي حامل سيف سرقو من المقلع. وحتّى على أرض المعركة لئن كنت غرقان بالخوف، كان عم ينده: «الشجاعة يا ابن أمي!» وبالآخر مات قدّام بيّي لئن اقتحم المعركة مثل النمر.

تيكولا: (متناولاً كشاشة الرغش المصنوعة من ذيل الحصان، يرمي بنفسه على الفراش، ملتفّاً في أسفل السرير، وملوحاً بالكشاشة هازئاً، وناظراً إلى زيرفو، ليقول كمن يطلق نكتة) ليش جيت لهون؟ ... أوه لحظة، ولا يهيمك، نسيت، مثل ما نسيت من قبل. جيت حتّى تقلنا إنو في حدا مات.

زيرفو: (متابعاً كلامه كأنه لم يسمع) بيك كان بطل. وحتّى قبل، بوقت السلم، كان فلاح

مَرْسَخ

آدمي بيخاف الله. كان يفيق من النوم قبل ما يظهروا الدجاجات من القن، ويكون عم بيصفر قبل ما العصافير تبلش تزفزي، كان يجهز ويسوق التيران، تيفلح الأرض ويمهداها قبل ما تطلع الشمس. لسعات كراباج بيك كانت المنبه يلي كان يفيق عليه كلّ الفلاحين. بتزكر ما كان يبقى بالمخازن مطرح نحط فيه حبوب، ولا شبر بالأرض ينزرع فيه، ولا حتى محل بالاسطبل لأحصنة وماشية زائدة. الإنجيرا¹² مُمَلّية سلال الميسوب¹³، والخواريف والماعز معاية الحظائر.. هيدا بيك...

تيكولا: (مقاطعاً إيّاه، وطاويّاً شفته الماكرة إلى جهة واحدة، ومتحدثاً باستهزاء) انسا هاملوضوع هللق وقلّي، إيمتي رح تروح؟
زيرفو: (مأخوذاً بالمفاجأة) إيه؟ (محاولاً رفع نظره، يُصاب بنوبة ألم تجعله يُمسك معدته بكلتي يديه ويتأوه)

تيكولا: (ينهض غاضباً وينظر إليه، ويقول بصوت عالٍ) إيمتي رح تروح!
(تنطفئ أضواء المسرح بسرعة).

المشهد 2

مرّت دقيقتان. وبينما تعود الأضواء على مهل، نسمع سعال تيليليا. لم يغيّر تيكولا وزيرفو موقعيهما منذ أن انتهى المشهد الأول. يدخل موغيس.

موغيس: (دون أن يرى تيكولا) رجعت لأني ضيّعت غرض، آبيي، معقول تركتو هون؟
(عندما يلاحظ كيف يقف الاثنان، يلتفت إليهما) شو بكن؟ (ينهض تيكولا من السرير

12 نوع من خبز المرقوق يؤكل مع كل شيء.

13 سلّة تقليدية يُحمل فيها الطعام ويُنقل.

مَ رَسَ حُ

ويغادر البيت بسرعة دون أن يلتفت وراءه)

زيرفو: (كان يسوّي الصورة ببطنه، ثم أخذها بيده) معقول يكون هيدا الغرض الضايح؟
موغيس: (يأخذ الصورة بسرعة وينظر إليها) هيدا هوّي. (بعد صمت قليل، وبفرح) شو كنت عم بعمل توقّعتها هيك؟ (بانتباه يعيدها إلى محفظته) كنت ضايح كثير بالشغل حتّى بالأخر أخذت استراحة زغيرة وجيت عالبيت.

زيرفو: (متردّداً وعلى نحو عصبّي) موغيسي!!¹⁴

معقول لاقى معك شي برّين¹⁵ ثلاثة؟

موغيس: لاء ما معي. عطيت القليل يلي كان معي لتيكولا من شوي. بعتمد لمن وقّعت الصورة. ليه، في شي؟

زيرفو: إيه في، بدّي ياهن حتّى ادفعن للحكيم. كتبلي وصفة لاشترى حبوب دوا ... بعدني ما ردّيتلك يلي أخذتن آخر مرّة.

موغيس: آه مش مشكلة، ماشي الحال، فيك تردّلي ياهن على مهلك. (صمت قصير. يمكن سماع سعال تليلا. موغيس يتكلّم ببطء كأنه متردّد) كنت بدّي إسألك عن شي، أبيي... (صمت قصير)

زيرفو: (كأنه يتذكّر بسعادة شيئاً جميلاً) كنت عارف موغيسي! (طريقة أخرى للفظ الاسم تودّداً) بعرف شو هوّي هالخبر السعيد يلي كنت بدك تخبرني ياه. وإذا هوّي الشّي يلي بابالي، بتكون بركة ابن مريم فعلاً حلّت عليك! بيكون عن جد باركك ابن الله! (وفيما يتحرّك زيرفو مقترباً أكثر من موغيس، يدبر الأخير ظهره له. يبقى زيرفو في مكانه).

موغيس: (بعد لحظات، وبفتور) لاء منو خبر منيح. إذا مفكّر رح قلّك إنّي تخلّيت عن

¹⁴ اسم موغيس يلفظ هكذا تودّداً، ويعني «موغيس خاصتي - الذي لي.

¹⁵ بر: هو العملة الأثيوبية

مَ رَسَخْ

حياة المدينة وروح إرجع على أرض بَيْننا وصير فَلَاح، يعني بتكون غلطان... ليش إذا بقلِّك
 إني رايح على الضيعة حتى صير فلاح، بيكون هالشي يُعني إني عرفت شو بدّي. (زيرفو
 خائباً، يعود إلى السرير ويجلس. وبعد صمت قليل، يكمل موغيس) آبيي، أنا والناس
 يلي متلي ما منعرف شو بدنا. نحنا، ولاد هالجيل، ما عتأ أُسُس، وما عملنا إلا شي قليل،
 نحنا العشب يلي لازم ينقبع من الحقل، نحنا الزرع يلي ما بيحمل إلا الشر. إنت بتعرف
 شو بدِّك، وإذا بتعرف شو بدِّك إنت محظوظ. أنا نسيت من وين جيت، وما قادر
 شوف وين أنا هلاً ولا حتى لوين رايح. هيدا هوّي يلي بيسمّوه لعنة. معلّمي يا آبيي،
 هوّي زلمة ختبار وآدمي. أحياناً لمن بيحكيلي عن مشاكلو كإني صاحبو، يقول: «وهيك
 يا موغيسايي، عم خبّرَك هالأمر على أمل إنك تتعلّم من مشاكل حياتي». مبارح بالليل،
 سألني، «بدّي إتزوِّج خادمتي يا موغيس، شو رأيك؟» قلّي، «تعبت من شحادة الفتافيت
 يلي بتبقي ورا الناس». وقلّي، «سألت قرابيني ودبرولي مرا ما في متلا بتنظيم البيت».
 مبارح أخذني على بيتو عالغدا حتى أخذ فكرة عن عبقريتها بشغل البيت ودوّقتي صحن
 «الدورو ويت» يلي بتعملو (طبق من دجاج وبيض مسلوقة) و«المينشت حبش» (طبق
 من لحم البقر المفروم). وشي ذقت كاس «التيلا» (نوع من الكحول مشابه للبيرة) من
 شغل يديها، بلش يزخني العرق من ظهري. ولمن قدّمتلنا كل شي، انسحبت بسرعة
 لمخبأها، وخبّت مشاعرها... ما كان عارف إنو خادمته هيّي تيهوناي. ما كان عارف
 إنها كانت مرتي. لمّا رجعنا على المكتب بعد الغدا، قلّي ونحنا عالطريق، «شو رأيك يا
 موغيسايي».

(بعد لحظات)

شو لازم قُلُو يا آبيي؟

زيرفو: (ينتفض غاضباً، غضباً مبريراً) قُوصو! ... شو ناطر؟ هالشي مش ممكن يصير بيتتنا.
 بهالحالة «لا يسلم الشرف الرفيع من الأذى، لمن حدا بيقرّب صوب إرث بيك أو صوب
 مرتك»، هيك تمامًا يقول المثل! قُوصو!!

مَ رَسَخ

موغيس: (كما لو أنه سمع ولم يستوعب، يتحرك إلى يسار مقدمة المسرح ويكمل كلامه بنبرة أبطأ وأكثر تأملاً) معلّمي وظّف خوري متعلّم وصاروا كلّ الشباب بمنطقتنا يجتمعوا عند الطرف الخلفي لبيتنا وياخدوا دروس. لمحت ابني بوسط هالمجموعة. كان اللوح محطوط بالوج وشفّت ابني عم يخطّط عليه كل حرف (من أحرف اللغة الأمهرية) بريشة من عشب، وعم بيهجّهن واحد واحد: «أ - بو - جي - دا». (صمت قليل). لكن هوّي ما شافني. وحّتي لو شافني، ما كان رح يتدّكرني. كان بعدو صغير لمن تيهوناي أخذتو وراحت. قلّي معلّمي، «اسم ابنها ديغافاي، وأحياناً بتناديه بيتنا». وقال إنّها خرتو «إنّها حلفت يمين ما بتلفظ اسم بيّو، بس بعتمد إنّها ما بتعرف مين بيكون هالأب». قلّي، «كم اسم أب يا موغيساي بتتوقّع هالشرايمط بيتدّكروا؟» وضحك. «ورغم هالشي أنا بحسّ بهالطفل» هيك قلّي. وقال كمان إنّو قلبو بينكسر لمن بيحي عالمكتب ويصير يلفّ حواليه، ويناديه آبايي (طريقة محبّبة لمناداة آبا) (صمت) ... شو رأيك يا آبيي؟

زيرفو: (بمرارة كبيرة) الموت! الموت! الموت بيكون أرحم حلّ!

موغيس: (بعد برهة صمت، يعود ويتابع كلامه، غارقاً في أفكاره، كأنه سمع ولم يستوعب) آبيي، تيهوناي بعنت أبونا الروحي تيجي على المكتب اليوم الصبح. وقلّي، «بتقلّك، بدّك تخليّ ابنك بلا علم ويعسر كل شي عندو متل ما إنت عملت، ولا بدّك ياني إتخليّ عن ارتباطي المريح وإرجع لحياة الدعارة، أوعى تفكر توجّه وجك صوب بيتي أو تقربّ على بايي». وهيك مُسكت بإيدي صليبو يلي معلقو، وحلفت يمين إنّّي ما رح إرجع شوفها أبداً، وراح. (لحظة صمت) آبيي، إبنّي تعوّد على التياب والصبايط يلي ما بيقدّر واحد متلي يشتريلو يهاها. تعوّد على الألعاب، والبسكليتات يلي مش قدرني اشتريهن. صار معوّد ياكل الأكل يلي ما بقدر أنا اشتريه! آبيي...

زيرفو: بحياة الله يا ابني، حاجي تعيطلي آبيي! (بنبرة ذهول) النار ما بتولّد إلا الرماد! النار بتولّد الرماد وبس!¹⁶ بدل ما تاكل من وليمة جنازتك وإنت بعدك عايش، ليش ما

16 تعني أن الشخص العظيم يمكن أن ينجب شخصاً ضعيفاً، عديم الفائدة، ولا يرقى لعظمة أهله.

مَ رَسَّ حَ

بترجّع مرتك وإبنك وبتاخذ ورتة بيك! إنت ابن رجال عظيم بتعرف هالشئ! إنت رجال، صحيح أو لاء! ... يلاً بقى! إصحى قبل ما تصير عظام بيك شوك وتغرّف فيك! إنت مش رجال؟

موغيس: (لا يجيب على الفور، يتحرك من وسط المسرح متقدماً نحو الجمهور) شو قصدك بالضبط بكلمة رجال يا أبيي؟ أنا ما بفهم شو يعني إنو يكون الواحد رجال. هل يعني إنك تكون مثل حشرة بتطير بنص النار؟ نحنا ولاد هالأيام، يا أبيي، مندفن مشاعرنّا بآمالنا، مثل السلاحف والحلزونات، وهيك منجرجر حالنا من وقت للتاني. ولمن إنتو آباءنا بتحكونا القصص، بالعادة بتقولوا، «يأي بيقول إنو حياتو مكسورة، هوّي يلي أكل القايل إنو حياتو مدفونة». إيه يا أبيي، فخرنا الوحيد هو بانو إذا الواحد منّا قال إنو هالمّي مش غميقة ورمى حالو فيها، بتجي الريح لتخفق هالشخص وتقتلو. مثل ما سبق وقتلتك، أنا ويأي متلي، منّا من يأي بيعصّوا على الرصاص ويبفتشوا على مشاكل الحياة، ومش من يأي معاناتهن زادهن قوة وعزم، نحنا ناس هجرنا أصلنا وعم نوقع شوي شوي، أشخاص بليدين، ما بيطلع منن إلا أصوات مزعجة وفوضى. منحس إنو عم نعمل خدمة للإنسانية لمن منوقف بوسط المدينة، مزينين مثل مجوهرات معروضة للبيع، والناس عم بيتفرّجوا علينا، ولساناتنا منّا شاطرة إلا على يلي بيعملو غيرنا، مش نحنا. وبدل الغيم الطبيعي، السما قدام عيوننا مبطنّة بتلوّث سببه الإنسان وبدل ما نشغل منستعمل إيدينا بس للتحيّات وبعدها بيحلّ علينا التعب وما بعرف إذا هيدا قدرنا! (برهه صمت) عظام أبابا رح تجرحني مثل الشوك إذا ما بذلت كلّ جهدي منشان ابني مثل ما أبابا عمل كرماي. لمن تركني ابني يتنايي، ما في قلب نرف مثل قلبي، قلب بيو، بس قلبي رح يرجع ينرف مرة ثانية إذا بمنع عنه فرصة العلم ويتربّي تربية محترمة. (صمت قليل. يعود إلى المقعد ويجلس عند طرفه وبعد أن يمسخ جبينه بمنديله، يُخرج الصورة من محفظته ويحدّق فيها) شو رأيك يا أبيي؟

زيرفو: (يؤجل تجاوبه، ينهض من حيث يجلس وينظر إلى موغيس باستهزاء) ملعون!

مَ رَسَ حُ

بعقد هيدي هيّي اللعنة! قلتها بلسانك، هيدي هيّي اللعنة!!، هيدا كل شي صاير.
 (حائرًا، يصمت ويقترب من موغيس، يجلس إلى جانبه ويتابع بنبرة الناصح): اسمع يا
 ابني يَلِي عم قلّك ياه. بدل ما تبيع مرتك وابنك، خدهن وروح عارض بيّك وخليهن
 يعيشوا من تعب جبينن. الله كمان بيقول هيّك يا موغيساي... (موغيس، محتقناً، ينهض
 من حيث يجلس بجانبه ويتعد عنه مديراً ظهره له. زيرفو يكمل على نحو أكثر صرامة)
 هالشي هوّي روح شيطانيّة ولا مرض!؟، لازم قلّك إنك ما قنعنتي!؟ إعتبر إنك صرت عم
 تحكي بلا منطق!؟

موغيس: (يدور حوله غاضباً ويتحدث من بين فكين مطبقين كي لا يرفع صوته في وجهه)
 آبيي خلص، ما تقول إنيّ مش منطقي! إنسى كل هالموضوع. كانت مزحة وخلصنا. (على
 نحو أبطاً قليلاً) وإذا ما بدك تعطيني نصيحة، شو بدك بهالقصة! بس ما تقول إنيّ مش
 منطقي! (يعطيه ظهره مرّة أخرى ويقف على هذا النحو. صمت طويل).

زيرفو: (يحي رأسه، وبنبرة نادمة) طيب، ما عاد رح قول شي... وأنت ما تقليّ بدك
 نصحتي. خلص انتهى الموضوع. (برهة صمت. زيرفو خائباً يتململ في مكانه. يتناول
 قشّة عن الأرض ويستخدمها كي ينظّف ما بين سنّيه الأماميين. يعضّها ويقطعها نصفين،
 ثم ييصق كلّ قطعة منها. يتململ. فجأة، وبنبرة متعجّبة) طيب! (بعد صمت) طيب!
 (بعد صمت) إذا الموضوع ما إلو علاقة بالصّحة، بيكون إلو علاقة بالسكر. سكر الروح.
 هيدا سكر الشجاعة، والروح!

موغيس: (يبقى في هذه الوضعية وقد أدار له ظهره. غضبه يهدأ لكنّه لم يتبدّد تماماً
 ويفور بين الفينة والأخرى موجّهاً فورانه إليه) سبق وقتلتك هالشي. قتلتك إنو كئا أسياد
 عالم سكران. قتلتك إنو كئا شهود عالشر، مدندين مثل عناقيد العنب من كروم العالم.
 وقتلتك حتّى إنو الفرحة كانت غامرتنا، معلّقين بالشجر ومنجرح السما، نحنا وعم نحاول
 نلمسها، كئا خرا هالعالم (بعد برهة صمت، يرفع الصورة أمام عينيه وينظر إليها، بشوق،
 ويكتم تنهداته. ثم يعود فجأة ويتوجّه إلى زيرفو، جاهداً في كتم الألم المحتقن في داخله)

مَ رَسَخ

ما بدّي دمرّ حظوظ ابني بالحياة متل ما عملت بحظوظي يا أبيي! وعم أعمل هالشي حتى يتناي ما يتأخر ويلاقى الوقت سبقو مثل ما صار فيي، يا أبيي! هيدا ابني يا أبي!
شو بدك ياني أعمل؟!...

زيرفو: (بيدين مفتوحتين، يتحرك موغيس نحو زيرفو كأنه يتوسّل إليه. يبعده زيرفو بيديه، فيبقيه على مسافة، تمنعه من الاقتراب أكثر... وهمرارة يقول) ما بعرف! ما بعرف! (يتراجع موغيس إلى الخلف. بعد صمت قليل، موغيس ويداه ما زالتا ممدودتين، يذهب إلى السرير وقد أخفض يديه ويستلقي. زيرفو الغارق بأفكاره يبدأ بتلفظ الكلمات، ببطء، وكأنه يكلم نفسه) ما بعرف يا موغيسي. (بعد صمت قليل) كلّ يّلي بعرفو عن بيّنا، يّلي كان وافي لكل وعد قطعو على حالو، وحرث الأرض بالثور، وكان ما ياكل قبل ما يكون سمّد كل أرضو. الأرض المسمّدة يّلي عشت عليها هيّي كل يّلي بعرفو، وهيّي صرخاتي بعد ما طلعت من رحم إمّي، الأرض يّلي ربيت عليها بعد وقعات كثيرة، يّلي وقفت عليها بأطرافي الأربعة، يّلي جرّحتها وحرثتها وأكلتها. بيّي كان واقف على هالأرض لمن مسكلي إيدي قبل ما إتعلّم المشي، لمن ركض هوّي وحملني على كتافو، لمن علمني قول «كش» للدجاج، وقُول «هوها» للدواب، لمن انبطح بوسط الحقل، تيفرجيني شعاع الشمس يّلي كان بعيد، لمن علّمني كيف اتعامل مع المواشي. ما تدير ضررك لهالأرض، يّلي ماتوا فيها أجدادك، وصارت أجسامن هيّي الأرض، يّلي حارب بيك كرماها، ويّلي ماتت فيها أمك، هيّي (الأرض) ممكن تصير مكان تقاعدك أو طريقتك للنسيان. الفجر يسرّب عالمنحدرات وييعربش عالتلال، بيوصلّ الضو المسروق، الصيف يبيلع الشتا، بتتلون الغيوم بشعاع الضو، ابتسامه جدك الأكبر وأحلامو السعيدة، القوّة، عرق أجدادك الأوّل، دمّ وبقايا آباءك... لمن تجي عاصفة وبترفع مية النهر، لمن الشجر بينحني قدام الريح، سعادة أجدادك الأوّلين، دموع أجدادك الأوّل... كلّ هالشي فيك توصلو وناطرك، تكون بهالأرض وتنجبل فيها، بتقلّك، وقّف يا ابني، ما تروح وتتركني. ما تخلي الشوق لهالأرض يتركك، بالعكس، خلي ذكراها ملو عيونك، حاضرة بصدر بيتك، كيف بتتجمع الهيّي لمن

مَ رَسَ حُ

بفيض النهر، كيف بتنزل من الشجر لتقطف الشولا¹⁷... بيجي الخريف، بيروح الخريف، ومننتقل من الحرارة للجفاف... بيقلّي أبابا، اتطلّع على هالاشيا بحماسة ومش بإهمال. كاستي الحليب يلّي كانت مصنوعة من قَرْن، مقلع الجلد يلّي كانوا يحملوني ياه، وبكون عم إضحك وإبكي، التلة يلّي ربّنتني، لمن زهرت من عالم الرحم، قلّي أبابا بعمرك ما تنسى الأرض حتّى يوم مماتك، ما تبعد عنها. قال أبابا، لمن لمعة الأرض المسمّدة بتدوب فيها، لمن الأعشاب بتنتقلع، غيوم تحت الشمس، لمن الشخص بتغمرو وبترفعو جناحات، فوق الوادي، لمن الوادي بتبلعو غابة كثيفة، الأرض سودا، السما سودا، البحر أسود، الناس سود. لمن غطا رقيق من الخصب بيغطّي كل شي، لمن رحم الأرض بيقدف هديّة، لمن أبنائها بتعدّوا من الحياة، لمن صدرا بيكوّن شعور قوي بالتملّك، ليّلّي عم بيطوف فيها وينمو، ليّلّي عم يغمرو الفرخ بين ثيابها، شعاعات نور الصبح المسروقة، بتراقص هيّي وعم تغمرها من بعيد، لما ولاد الأمل بيبرعموا، رحم الأرض ييفتح، الأرض الشهوانيّة يلّي ولدتك، الغابة بتشفط كلّ الهّي لما الأرض بتيسس، أنت بتقول إنّو ناس اليوم هنّي «جيل ما بيخلي إيديه تلمس الأرض»، وإنّو هيدي حصتك بالحياة، بس ممكن يروح من بالك أجساد وعرق آباءك!... كلّ يلّي بعرفو هوّي بيّي عم بينادي ويدعي للهداية، يفلح الأرض بالثيران، وياكل من بعد ما يتلمّ الأرض المسمّدة. (صمت مديد. يرتاح زيرفو حيث يجلس ويتابع) ما بعرف شو بالنسبة إلكن. وهيدا يلّي بخليني اعتقد إنّو هالشي متّو ص.. ص.. ص... ص...!

موغيس: (ناهضاً من حيث يجلس، بغضب عارم) رح نقاتل يا آبيي! ما تقليّ إيّ منّي منطقي!

زيرفو: (غاضباً أيضاً) إذا هالشي ما بيعني إنّك عم تفقد عقلك، بيكون... (محاولاً النهوض، يمسك معدته بكلتي يديه متألّماً ويبقى جاثماً في مكانه. يخاف موغيس ويقرب منه لمساعدته. زيرفو يتأوّه من الألم).

17 نوع من الثمار.

مَ رَسَ حُ

موغيس: (يقوده إلى المقعد ويُجلسه بعناية فيما يتكلم بسرعة بصوت ينهكه الألم) آبيي موجه! عم بيزيد الوجع؟ روق، ما تخاف، حتّى لو بدّي إتديّن، رح دبرلك هال 2 بر. بعناية يسند رأسه على مسند المقعد) عمهلك... شوي شوي... (أضواء المسرح تنطفئ ببطء).

المشهد 3

بعد دقيقتين عندما تعود أضواء المسرح بالتدرّج، لا يظهر موغيس كما في السابق. زيرفو بمفرده، على المقعد الآن، يداه ورجلاه ممدودتان، ومفتوحتان.

زيرفو: (ما زال جالساً، يمدّ يده اليمنى كي يتناول الكبرار المعلق فوق المقعد فينزله ويلعبه كأنّه بجينا¹⁸ بلحن مدينة ويدندن لنفسه)

حتّى لو، حتّى لو كنت مثل الأرض...

الميت، رفيقي سَماني الميّت

الميّت، رفيقي سَماني الميّت

لمّا شافني بشبه الأرض

حتّى لو، حتّى لو كنت مثل الأرض.

شو هَمّني إذا كنت بشبه الأرض

18 آلة موسيقية وترية لها عشر أوتار من عائلة القيثارة.

مَ رَسَ حُ

إذا بعد ما خلقتني وطعمتني، أكلتني؟
 من الأرض خُلِقت، من الأرض أكلت
 وبعد زمن طويل كثير، رح إرجع لهاالأرض
 مين قال إني كرهت الأرض وتخلّيت عنها؟
 حتّى لو، حتّى لو كنت مثل الأرض.
 الميّت، صديقي سمّاني الميّت
 لمن شافني بشبه الأرض...

يدفع تيكولا الباب ويفتحه ويدخل إلى الغرفة، يعيد زيرفو الكِرار إلى حيث كان. يدخل تيكولا ويبقى جامداً في مكانه لبعض الوقت. يقع زيرفو منهاراً على السرير. يرفع رقبته ويتنشّق الغطاء كأنّه شمّ رائحة كريهة. ثمّ ينهار مجدّداً. يسند رأسه بيديه الاثنتين ويحدّق بالسقف. يتململ. ينهض زيرفو من حيث يجلس، ويتقدّم نحو الجدار المشترك مع منزل آتو تيليليا. وحين ينتزع قطعة البساط المحشوة في ثقب هناك، يدخل الغرفة دخان ينبعث من منزل آتو تيليليا.

زيرفو: (فيما يضع قطعة البساط على الطاولة) إيه الوضع أحسن هيك. خَلّي البيت تطلع ريوحتو شوية دَخان. عنّا نقص بالبخّور. (يسمع سعال تيليليا. ينهض تيكولا من حيث يستلقي، يأخذ البساط عن الطاولة ويدسّه في الثقب. يعود ويستلقي) ليه رجعت سكرتو يا تيكولا؟ شو ما بتفهم، أنا بدي تطلع ريحة البيت دَخان. يا زلمة حتّى ريحة تحميم حبوب البن ما بتطلع ببيتنا. (يُسمع سعال تيليليا. ينتزع البساط من الثقب ويضعه على الطاولة).

تيكولا: (يندفع إلى الأمام ويعود ويحشو الثقب بالبساط) الشي الوحيد يلي بيحيب دَخنة من هالبيت هو السعلة، والسرطان، والإنفلونزا، والبزاق! (بعد برهة صمت، وفيما زيرفو

مَ رَسَ حُ

يجهد للوصول إلى الطاولة كي يضع البساط عليها، يأخذه تيكولا منه بخفة ويعيد حشو الثقب به. يعاد هذا الطقس مرتين إضافيتين، وفي المرة الثالثة، وبدل أن يقوم بوضع البساط على الطاولة، يضعه زيرفو بين يدي تيكولا. يمزق تيكولا البساط، يرميه على الأرض، ويعود ويستلقي. يلّم زيرفو قطع البساط ويجمعها، ويضعها على الطاولة. سعال تيليا مسموع. وفيما لا يزال مستلقياً يرفع تيكولا رأسه ويقول مثرثراً) يعني إنت بتعرف تدقّ عالكراار! ما معي خبر إنك بتعرف تدق. ليه، إذا بتعرف تدق، يعني ممكن تطّلع مصاري كثير، وممكن يطلبوك تشتغل محل ما مرت خيي تشتغل. ممكن تجيب شغل للشرايميط. كانت ما زلنتك هداك اليوم لمن رحوت وقلت إنك بتقربنا، لو كانت بتعرف هاموهبة الكبيرة يلي عندك. ناس كتار رح يعبرولك عن إعجابن ويقولوك قديش إنت رائع. كانت ما أصرت إنها تزعلك، وشربتك شي بارد.

ما بتحبني. إذا بتلمحني من بعيد، بتتصل بالبوليس. أووه أووه! عم بيكسري القناني، هيك بتقلن. معقول مفكرتني مجنون؟ لمن بتمرق من حدّي، ما بتدقري حتى.

(بعد صمت قصير) خبزك خيي قصة مرتو؟ (بعد لحظات يومئ زيرفو برأسه إيجاباً.) ينهض تيكولا من حيث يستلقي، يلتهم قطعة من الخبز الناشف المتروك على الطاولة، ويعود على نحو مفاجئ) امرأة أسطوريّة! من خادمة عند الشرايميط، لخادمة عند زجال ومّتون مزوجين. وهالشخص هوّي ربّ العمل يلي بيشتغل عندو خيي. وما تفكر إنو القصة هيك وبس، هني بيحبوا بعض. وبيقولوا إنو إختنا وظفتها. بس هيّي حتى ما بتحبني. وخياة عظام أبابا ما تقرب صوي، هيك بتقلي. وهالشي لأني قتلها إنها بتذكري ب سيرور مقطّع. قتلك إنها ربيّت على مهنة الدعارة. وهالأ كبرت على هالشغلة. خيي حلف يمين إنو ما عاد رح يلفظ إسمها. أنا ما بآمن بحلفان اليمين. بقضي وقتي عم استنا الفرصة لقول إسمها وإرميه وإبرقو وين ما بروح. ما عدت إهتم بيبي يفكروا فيه الناس. حتى هلاً أنا وعم أذكرها إدامك فيك تلاحظ إنّي ما عدت مهتم أبداً. (يقطع الخبز ثم يتناول قنينة الماء ويشرب ما تبقى فيها حتى آخر نقطة). ما عادت تحبني لأني بقلها

مَرْسَخ

إنّتي بتشبهي سرور مقطّع ومغسل. كانوا يسمّوها شرموطة. بس هلاً ارتفعت مرتبة وصار اسمها عاهرة!! ورغم هالشي ما زبطت معها. وبكل الأحوال بالنسبة إلي، بسميها سرور مقطّع. عندك فكرة شو هوّي سرور عيد الميلاد؟ بعتمد بتسموه تنغ؟ بعد ما بتقطع غصن من شجرة زيتون، شحّلو أطرافو، وعطّو بالزبدة والشحم، وحطّو بالشمس، وخليّه يحترق بالنار، ويصير بعزّ قوّتو، وهيك بصير عندك تنغ عيد الميلاد. وبعدها، قادة الفريق بيتحاربوا عليه، وبُعصي الميلاد يلي كل فريق قطعها من خشب شجرة الأوكالبتوس، شجرة الكيكتيتا، شجرة الكيببسا، شجرة الزيتون، شجرة الزينغا، شجرة الديدويو، من شجرة الغيراوا، من السينسيليم، بيصقّوا حد بعض وبيضربوا التنغ بجهة الهدف المعاكس. لهيك بيفركوه بالزبدة والشحم الحيواني، بيشتغلوا عترتibo وتسخينو، وشلّفطّتو، وكلّ هالاشيا ليلشوا فيه ضرب. مثل عصي عيد الميلاد، ما في بهاللعبة قائد أو فريق. ممكن يصير الضرب بأي مكان وممكن يفوت الهدف بأي إتجاه، الخبرية مئا مرهونة بالاختيار. من لمن قادة الفريق ببلشوا يتنافسوا عليه لوقت ما يرموه، بيكون تقطّع، انفلع، تشقّف، تأكل، وانتهى، وبيضلّ مفتوح قدام عصي الميلاد، لينضرب كلّ الوقت. إيه. لهالسبب بسمي إختنا سرور مشقّف. (ينهي التهام الخبز ويجلس على طرف المقعد). هيّ يلي اختارت زوجة خيي ودبرتلها وظيفة بيت الزلمي. حكي معك خيي عن مرتو، مزبوط؟ هالمخلوقة قصّة. (برهة صمت) شو رأيك؟

زيرفو: شو رأيي بشو؟

تيكولا: بخيي؟

زيرفو: أوه... (برهة صمت) بعتمد يلي ناقصو هوّي حدا ينصحو.

تيكولا: فيك إنت تقوم بهالمهمّة؟

زيرفو: (بعد برهة، وقد فكر بالأمر) لاء، طيب كيف ممكن أعرف؟

تيكولا: شي مرّة نصحت حدا بموضوع وساعدتو يتحسن؟

مَ رَسَخْ

زيرفو: (بتردد) لاء، يمكن شوي...

تيكولا: حدا ساعدك بشي موضوع من خلال نصيحتو إلك؟

زيرفو: (بتردد) ممكن... شوي...

تيكولا: في شي مرة ساعدت حالك من ورا نصيحة وجهتها لنفسك؟

زيرفو: (بعد برهة، وعلى نحو غير واثق) إي - ييه. ممكن، شوي... إيه.

تيكولا: النصيحة الوحيدة يلبي بتملكها هيبي عن الوسخ الأسود! ما عندك أي فكرة عن أي شي ثاني!! (برهة صمت. للحظة تبدو عليه بعض علامات الندم، لكنه على الفور، كمن يستيقظ من النوم) بس أنا ولا مرة عطيت نفسي نصيحة. أنا والضمر. الضمير، ما منتواجه عين بعين... وما ملتقى. أنا دائماً هربان من وعيي، من ضميري، بالحقيقة وبالعلم كمان. إيه، نحنا

... مش عَدُوْق بعض. (فجأة ينتزع بقّة من شعره. يفرکہا بين أصبعين من أصابعه، ويرميها على الأرض ويدوسها بقسوة بكعب حذائه مرتين، وفي المرة الثالثة يسحقها بكعبه ويغرق في التفكير. شاردأ. يجلس حيث كان جالساً في السابق ويتوجّه إلى زيرفو) شي مرة قدرت تهرب من ضميرك؟

زيرفو: (مُتفكراً في الأمر) بالحقيقة ما بعرف... ما بعرف... والله ما بعرف.

تيكولا: (يضع في الأفكار ويعود مرة أخرى) يمكن لهالسبب ما بحتاج لنصيحة. إيه يمكن هيدا السبب. (برهة صمت) شو رأيك؟

زيرفو: رأيي بشو؟ (يميل كي يضمّ معدته بيديه من الأم)

تيكولا: (بعد برهة صمت) لاء ما شي. (برهة صمت) إنسى. (بعد برهة صمت ينهض من حيث يجلس) قلت إنو خبي بحاجة لمن ينصحو؟

مَ رَسَّ حَ

زيرفو: (بتردد) إيه... إيه... غالباً إيه.. بحاجة لحدا إيه.

تيكولا: إيه. على الأرجح بحاجة لحدا. شوف، لمن خيبي بيتعلق بشي، بيكون مثل الحمار يلي عم يشرب مي. بيشفظ كلشي، هيك مثل الحمار، وما بيخلي ولا نقطة. حتى بعد ما يمضي الوقت، وحتى لو نقال شي عن الموضوع، ما عندو قيمة لشي. لمن ترضيه كباية تيلا كبيرة مش مصفاية، ببطل يطعلو حسن. وحتى لمن يكون راضي، هالشي ما بيكون إلا منظر.. دخان براني. (برهة صمت) مبارح مبارح بالليل، شفت ناطور حرس منحنى بزواية معتمة وعم بيولع سيكارة، وفجأة شفت نار الولاة عم بتضوي جبينو وعلى مهلو صار وهج النار ينزل وفكرت النار ولعت بالرجال. ولمن بسرعة بعد عن العتمة وشفتمو عم يتنفس (بصوت عال) بين انو تموم معباً دخان سواكير رخيصة! (برهة صمت) خيبي حالتو بتشبه هيك، بيقضي وقتو عم ياكل نار، بس كل يلي بيطلع هووي دخان! (برهة صمت). يمكن سماع صفرة طويلة من الخارج. تيكولا يشنف أذنيه. بعدها يمكن سماع صفرتين أقل طولاً واحدة إثر الأخرى. يدخل موغيس مندفعاً، ويقف على السيرير ويفتح الشباك عند رأس السيرير، وبعد إطلاقه صفرة طويلة وصفرتين قصيرتين، يطوي شفته السفلى بإصبعيه، وينادي صارخاً)

موغيس: هاي! هاي! جاية! سمعتك! - في اللغة الأمهرية هناك طريقتان لمناداة رجل أو امرأة، وهنا موغيس ينادي امرأة - اليوم هووي يوم كوتشيرا¹⁹ ما تنسي هالشي! نادي لجوني وبيرت وانطريني! جوني ما معو مصاري، لهيك راح على محطة القطار تيشوف إذا فيه يشحد أو يلاقي سواكير! أما بيرت، فعلاً أغلب تكون عم تفتح بواب السيارات قدام مدخل فندق «راس» وعم تعبتي جيبته بخشيش! مفكرة كل أجنبي ممكن يعطيها! وما بتميز السائح عن جنود حفظ السلام! أما بالنسبة إلي، فأنا دايماً مكسور! منلتقى هونيك، باي! باي! (يُخرج سكيناً صغيراً من جيب بنطاله ثم يعيدها. وينزل عن السيرير بخبطة). رح نقضي الليلة عم نلون الكوتشيرا بالأحمر! رح نسهر كل الليل عم نلونها بالدم الأحمر!

19 يوم يكون فيه الكحول أرخص مُناً.

م ز س ح

زيرفو: (ما زال محتضناً معدته بهدوء) شو قلت؟

تيكولا: (بهدهوء و غضب) خف وجع البنكرياس؟

زيرفو: إيه؟

تيكولا: وجع البنكرياس تيعولك؟!

زيرفو: (بقليلٍ من التفاجؤ والتردد) شو... شو فيي أعمل برأيك...

تيكولا: (صارخاً) فإذن ليه ما بتروح! عم قللك ليه ما بتروح! (يمشي نحو الباب. يندفع عائداً، ينتزع البساط عن الطاولة، ويسدّ به الثقب في الجدار. يندفع خارجاً ويغادر).

(بسرعة تنطفئ أضواء المسرح).

القسم الثاني

المشهد 1

اليوم التالي، السبت، الساعة الواحدة بعد الظهر. المسرح ما زال معتماً. من مكان العمل القريب، يتعالى صوت المنبّه معلناً الثالثة بعد الظهر. سعال تيليليا مسموع. عندما تضاء الأنوار، يبدو البيت خالياً. يدخل زيرفو على الفور، متخبطاً من الألم، يشد على معدته بيديه، لاهثاً.

زيرفو: (يقف منحنياً على السرير). ما في حتّى باب ورّاني. الناس المحترمة مستحيل يقدرُوا يتمشّوا بنص المدينة. آه على المدينة! هلاً عنجد هاي عيشي يَلّي عايشينها؟ يا مخلص العالم، ليش ما بتخليّ هالولاد يصيروا مستاهلين ورته بيّون؟ آه على حياة الفسق هيدي! معقول تكون أهملتهن؟ إذا ميّة العمادة (مياه «التبيل»، أي المياه المقدّسة) انذرت قدّامن بيصيروا يضحكوا. ليش. تصرفات الصغير بينهن ما بتتصدّق. مبارح صَهَر مستعجل أول النهار وما رجع لنصّ الليل، عم يلهت وتيابو غرقانة بالدّم. هويّ ونايم كان عم يشوف كوايس، ويرم ويتقلّب، ويلبّط، وبعدها، قبل ما يصيح الديك، راح وبعده ويرجع! طيب شو هيّي هالضهرات بالليل، فيّي أعرف! وين معقول يكون عم يروح! الناس والبيوت الكتار بيخوفوا، بيحسّسوك وكأنو بغابة مدنيّة. غابة اسمنت. المكزدرين، السيّارات، النصابين، الناس الناظرين قدّام قصر العدل، المشاغين، العاطلين عن العمل، الشخّادين، المجانين، وكلّن! شايف شو فيها أنواع بشر! ليش ما بتوجّه سبيل هالولاد باتجاه أرض بيّون؟ بالنسبة إليّ، سبق وطلبت منّي وقّف أسئلة وطلبات، قلبك قسي عليّي. حتّى إنك ما بعنت خادمك الأوّل تياخدني. (سعال تيليليا مسموع وعلى الفور راح يعلو) كيفك يابا! بعتمد ما سمعني. (يفرغ الثقب ويتكلّم بصوت عالٍ من

مَ رَسَ حُ

خلاله) كيف الحال! انشا الله عم تتحسن! أخخ! ما بعتمد إنو سمعني. (يتك الخرقه على الطاولة. يدخل موعيس ومعه خبز رخيص ملفوف بجريدة تحت ذراعه وفي يده اليمنى الصحيفة الأسبوعية التي تصدرها دائرة الشرطة. وجهه ممتقع بالحزن. يضع الخبز على الطاولة ويتمدد على السرير. يتحرك زيرفو نحو موعيس) منيح يلّي جيت موعيسي، منيح يلّي جيت. عندي هموم بدّي شاركك ياها. شوف يا موعيسي (على الرغم من أنّه يمكن قراءة الاضطراب في روح موعيس على جبينه إلا أنّ زيرفو لا يلاحظ شيئاً. يرفع نفسه حيث يستلقي ويستمر في تصفّح الجريدة، ويجلس. يتابع زيرفو على نحو متردّد) شوف، «الشرف» مكتوب باعتبارو كلمة الله. (يتردّد) شوف يا موعيسي، البيّ بينصح إبنو، والأكبر بينصح الأصغر. وهلاًّ بدّي يك تمرق النصيحة لحدن ثاني. بالنهاية، حتّى لو إنّي ما خلّفتكم، بس أنا ببقى بيكون. حتّى إنو في مثل يقول، «ابن الخيّ هوّي ابنك يلّي ما خلّفتو». حيّك، متل ما شايف، عندو تصرفات خاصّة فيه. من دون إنذار بينفجر بوجّي. كل شي بيعملو متو طبيعي. آخ يا موعيسي، هالشي ما بيمشي معي. من الأفضل إنك توقفو عند حدّو. عندو ميل لتحويل الإشي المنيحة ويعطيها معاني سيئة. كل شي بيكون ماشي وفجأة بيغلي وبيفور وبيعصب متل النمر. وفوق كلّ الإشي عندو تعبير بيستخدمو: «رُخّلو». وبيالغ فيه وبيطلّ يقدر ما يستعمل هالكلمة «رُخّلو - رُخّلو». هلّلق بشرفك هيدا حكي أمهري؟ الله من عندو يهديك، هيدا أمهري؟ لا، ما رح يمشي الحال يا موعيسي، دخيلك وقّفو. (وموعيس، بتصميم وهدوء يطوي الجريدة مرّة إثر أخرى، كأنّه لم يسمع شيئاً ممّا قيل. بعد برهة، يُشير زيرفو بنزق إلى السكين عند رأس السرير) شفت هالسكّين؟ شفت هالسكّين يا موعيسي؟ أنا، بيّك، اشتغلت فيها. صحيح إنّي ما جيت ولاد، بس هيّي (السكّين) بنتي. إيدي اليمين، الشخص يلّي بيواسيني بالأيّام السودا. وقت السلم، هيّي حد تختي، وقت الغربة ما بتفارق خصري. إذا قريب بحبو خائي، هيّي ما بتخويّي. هيّي معي، مثل ري يلي بعبدو. بتواسيني وبتتودّدي. بتسمعني إذا بشكي. بتنتقم من يلي عم يعتدي عليّي. شايف يا موعيسي، أنا، بيّك، اشتغلت معها! (للمرّة الأولى، يستيقظ موعيس من حلم يقظته في الجريدة ويحدّق في زيرفو بعينين

مَ رَسَّ حَ

فارغتين، تائهاً بعض الشيء، وبعض الشيء معاتباً. يتملأه، ويتفحصه. عينه في عينه، ينظران إلى بعضهما البعض لبرهة. من ثمّ تبتعد عينا زيرفو على مهل. ويعاود احتضان معدته، ويقترّب من السرير ويجلس ورأسه منحنيّ صمت مديد).

موغيس: (يتوجّه إلى الصحيفة ومن ثمّ إلى زيرفو مرّة أخرى، وبنبرة ندم) آبي، بخبرك الخبر السيء يلي قريتو بالجريدة؟

زيرفو: (بهلع) شو هل الخبر السيء، قلي!

موغيس: (أخذاً وقته) اسمع! (يقرأ)

«كشفت دائرة الشرطة في المنطقة الثانية ليلة أمس الجمعة، عند الساعة العاشرة والربع، في منطقة تُعرف بـ كوتشيرا، وعند الجسر الواقع على بعد ثلاثين متراً إلى غرب المنطقة المعروفة بـ أيبغاز تيليلو، عن ثلاثة لصوص، لا يعرف عنهم إلى الآن عنهم سوى ملامحهم وأطوال قامتهم، أسماؤهم وعناوينهم ما زالت مجهولة، قاموا باقتحام منزل آتو أشاغراوي غورمو، وطعنوا الأخير في فخذه بسكين، وهربوا بعد أن أرهبوا خادمته تيهوناي. وأفاد آتو أشاغراوي غورمو أنّه وقبل هذه الليلة لم يكن قد شاهد أيّاً من وجوه اللصوص هؤلاء ولم يعرف اسم أيّ منهم. لكنّ خادمته، الوزيرو (الآنسة) تيهوناي أشارت في إفادتها أنّ واحداً من هؤلاء اللصوص الثلاثة يُشبه الأخ الأصغر لزوجها السابق، تيكولا يتنا، إلا أنّها غير متأكّدة لأنّهم حين قيّدوها، كان العتم مخيماً، كما أنّها لم ترى اللصين الآخرين. وحين سئلت إن كانت تستطيع أن تدلّ الشرطة إلى منزل زوجها السابق، قالت أنّه مضى أكثر من سنتين على انفصالهما، وأنّها تعرف فقط الحيّ الذي كان يسكن فيه سابقاً، وليس حيّه الراهن. بالرغم من هذا، وما أنّ أفادت في أنّ شقيقته تعيش في منطقة كوتشيرا وتعمل عاهرة وتبيع الكحول وأنّها (أي تيهوناي) تعرف عنوان سكنها وأن زوجها السابق وربّ عملها الحالي آتو أشاغراوي غورمو يعملان في المكان نفسه، أفادتنا دائرة الشرطة في المنطقة الثانية بأنّ المسألة قيد التحقيق. وفي الأثناء يخضع آتو أشاغراوي

مَرْسَخ

للعلاج في مستشفى دغماوي مينيليك».

(برهة صمت. يقذف الجريدة على السرير وبعد وقفة قصيرة، وبنبرة مُحادثة) وهيك، اليوم الصبح، بعلمي كل شي ماشي الحال، رحنا على المكتب ولاقيت الشرطة ناظريني، قالولي تعا، أنت مطلوب للتحقيق، أخذوني، وقضيت كل هالوقت عذمة التحقيق. وَعَدْتُهُمْ إني بلّغهم شي إنو يجي تيكولا عالبيت، أو إذا اكتشفت وين بيكون، اتصلت بحدن تيكفلني، ورجعت على البيت وهيدا يلي صار. (صمت مديد).

زيرفو: (يتكلم بحزن مريع) آخ! آخ، يا مريم النور! آخ! (برهة صمت). يعني هلا شو لازم نعمل، يا موغيسي؟

(برهة صمت. يدخل تيكولا فجأة. ينظران إليه بوجل. ينظر تيكولا بسرعة كي يرى إن كان ثمة غيرهما في المنزل، يذهب نحو الباب وينظر إلى الخارج، يوصد الباب من الداخل، يضع يديه في جيبي بنطاله، ويقف هناك مرتجفاً).

تيكولا: (للمرة الأولى بنبرة هادئة) آبيي... آبيي، دخلك ب - بيينا، ب - بيي، كيف كان؟ (برهة صمت).

زيرفو: ليش بيك... بيك كانت كل المنطقة تعتبرو رجال عظيم، يا تيكولاياي. بيك كان شخص إذا قوَّص ما بيخطئ هدفو، والكل بيسمعو لمن يغضب، والكل بيخاف منو إذا حمل سلاح. بيك كان رجال!

تيكولا: (بسام) بيكفي، بيكفي. (صمت) بيكفي. (بعد برهة صمت) شفت، لأنو أنا وأنت ما منجتم، ما منتفق أبداً. لمن بسألك، كيف كان بيي، بقصد ضحكوتو، ومش عصبيتو. مش الخوف يلي كان ينشرو لمن يحمل سلاح.. أناقتو لمن بليس. مش سرعة طلقاتو، بدي أعرف عن كلامو الهادي، ضحكوتو، وحكيو. أنت بتخبرني يلي بدك ياه، ومش يلي بطلب منك تخبرني ياه. يلي بدّي أعرفو هوّي حكمتو لمن يكون حزين، الفرق يلي بين ستيه الإدمايين لمن بيتبسم، حضورو المؤثر لمن يتحدّث، كيف كانت شخصيتو. مش كيف كان

مَ رَسَخ

من بزأ، كيف كان من جوآ، من قلبو. مش بيبي «الرجال»، إثمأ بيبي الإنسان. مش بيبي «البطل»، إثمأ بيبي الأب. (بطء) عم تفهم؟ (زيرفو، الذي يذهله ما يسمع، يبقى صامتاً - تيكولا، ببطء، وبنبرة يائسة) بيكفي... بيكفي!! (برهة صمت).

زيرفو: (يتناول القصة الصغيرة التي سقطت عن طرف السرير ويضعها إلى جانبه). شفت هالقصة اليابسة يا موعيسي. كانت لجدنا يلي عطاها لوالدكم. بإيام جدنا، كل واحد ما كان قاتل قتيل وملوث بالدم ما كان يتزوج، فراح على غابة فيلة وجاب هالقصة من الصحرا. ومن هداك الوقت، ما في لا سبت ولا أحد فارقت فيهن هالقصة بيك. لمن راح تيركح ويصلي قدام الكنيسة، لمن راح على وسط المدينة بشغل، لمن راح على المجلس ليعقد السلام والصلحة، كانت هالقصة بإيدو. وبيقولولو فيه قصب كثير أحسن منها، ليش وين ما رحت هالقصة بتصلها معك، يجاوبهم، «لتخليني فكر بيبي مضي». وبيقولن، «يلي ما بيفكر بالماضي، ما يقدر يستوعب حضور المستقبل ولا يتحضر له». (بعد صمت قصير، وإذ انحنى كي يتناول القصة، يحتضن معدته من الألم ويبقى منحنيًا. وعندما يساعده موعيس بهدوء كي يجلس هناك، يأخذ نفساً ويستمر بالكلام، بين وخزة ألم وأخرى). شفت يا موعيسي، المسألة مش مسألة تفضيل يلي بدّي ياه، إثمأ تفضيل يلي بالحقيقة بعرفو. القصة مش قصة «ضحكة وحديث» بيك يلي بذكرهن، إثمأ رجوليتو الحازمة وجروتو بالفلاحة. (صمت، يلهث من الألم، يبسط راحتي يديه على الأرض أمامه وبصوت تقطعه الدموع) شايف هالايدين؟؟ شايف هالايدين؟؟ قضاوا حياتن كلها عم ينضفوا الوسخ الأسود وهللق صاروا مثل الوسخ. قضاوا أيامن مع البقر لحتى صارت ريحتون مثل ريحة الطرش. قضاوا الشتا عم يغرسو الأرض، ويحرقوها، ويبذروا الزرع. وقضاوا الصيف تحت الشمس الساطعة، ميبسين مثل الأرض البور. وهلق تفسحوا وتشققوا. لكن إيديي كمان يفهموا إئو وسخ جدودي الأسود هوّي بيون يلي ييمنحون الحياة وهوّي بيتون الآمن. لمن الزرع بيئما وبيكبر، يبصروا إيديي ينزوا شحم مثل جاط زبدة عاملتو ست بيت شاطرة. لمن النار توصل لحقل الحصاد، بتصير إيديي

مَ رَسَ حَ

تحكني كأنو فيها حبوب بترعا. لكن رغم كل شي، بحياتها إيدي ما خجلتني. بس هلاء خريف العمر بلش يقرب مئي يا موعيسي. شمس عمري عم تغرب. من هلق ورايح، أرض بيك يلي غزتها الغابة، ما لازم تلمسها إلا إيدك يلي بحياتها ما لمست الوسخ. لآتو إيدي وقت خدمتها بأيامها. موعيسي.. (بيدأ ثم يتوقف، كما لو أنه فقد الأمل. برهة صمت. ينظر موعيس وتيكولا أحدهما إلى الآخر ثم يلتفتان مُبَعِدِينَ نظريهما. بعدها مباشرة، يلهث زيرفو من الألم ويحتضن معدته بيديه. سعال تليلا مسموع).

تيكولا: (يتوقف سعال تليلا، وبصوت حانق) لمن الواحد منكن بيوقف يئن، بلش الثاني بسعلة السرطان. (برهة صمت. وكأن ذلك من عاداته، يلتفت، ويتكلم على نحو مُستهزئ) خلتك تحزن يا آبيي؟ حصتي بالحياة هي إني خلي الناس تحزن. (تخرج من زيرفو تنهيدة أم. ينتظر تيكولا قليلا ثم يكمل) لمن كنت بالصف الخامس، في بنت بشعة بتشبه الفزاعة سألت عن الدموع، شو بتكون؟ «عن جد شو هي؟» قالت. «إذا أنا بعرف حالي، العرق بينزل من جبيني، وما بينزل دموع من عيوني». قالت، «ولمن بيحي يوم يدهن يخونوني فيه ويحاولوا ينزلوا، بيخلي قلبي يُنعصر، ومعدتي تحترق، بس ما يدبلوا عيني.. شو هئي الدموع». (صمت) بس هلق هالبت صارت حدن مهم، هلق صارت بتهتم بحالها، بتستخدم وبتستأجر الناس يلي بتنزل من عيونهم دموع، يلي بكاهم بيقهر... إيه، هلاء عم تهتم بحالها... هلق صارت شخصية قوية. (بعد برهة، يضحك بسخرية، ويقرب من زيرفو) وأنت كمان كون هيك، ما تبكي، ما تشغل بالك، ما تبكي مرارة... يعني يا آبيي زيرفو، إذا كنت خلتك تصير حزين، هيدا لآتو شغلتني بالحياة خلي الناس يحزنوا... شفت يا آبيي زيرفو...

موعيس: (فجأة يقف غاضبا، يلتفت إلى تيكولا ويريه الجريدة، صارخا) إنسى كل هالاشيا هلق، شفت هالجريدة!! (يحدق فيه غاضبا. ينظر تيكولا إليه دون أن يقول شيئا. بعد صمت قليل يهدأ غضب موعيس، ويعود إلى حيث كان يجلس ويتكلم بهدوء) إنسى هالموضوع وخبرني، سبق وشف هالجريدة؟ (برهة صمت).

مَ رَسَخ

تيكولا: (يفهم الموضوع لكنّه يتظاهر بأنه لا يفهم، ويتحدث باستخفاف) مين يلي المفروض إنيّ كون عم بتركو وحدو؟ آبيي بسبب دموعو؟ (برهة صمت. وفيما يستغرق في أفكاره، تتحرّك أنفاسه السريعة والقصيرة، وتتراقص عيناه ذات اليمين وذات اليسار، ويظهر ارتجافه. وبلتفت على الفور نحو زيرفو) بالنسبة لآبيي، ما تخاف عليه كُونو وحدو، أنا مغطّيه من كلّ النواحي، لمنّ بيندهلي بجواب، ولمنّ يببعت بطليي بسأل بس للحدّ يلي بخليّه مسوط. شو فيّي أعمل أكثر؟ هلّقى أرجوك، كون أنت الحكم؟ ليل نهار بسألو، تحسّن معك البنكرياس؟ بتفقّدلو طولو، بتفقّد شرايين دمو، وبقول، يا الله، أنت حصتي، أنت همّي. جيت الصبح بكّي، يا إلهي، وبلّش اختباري، يا رب، بلّشت محاكمتي، وبقول إنو آبيي. شو فيّي أعمل أكثر من هيك! رح يضل تحت نظري ورح قول، إنت جملي التقييل! (وإذ يزداد الألم، يحتضن زيرفو معدته بيديه ويتأوه متألماً. موعيس يسندُ زيرفو باتجاه معاكس وحين يمّده على سريره، يقول تيكولا، وهو يتابعهما بنظره) شو فيّي أعمل بعد؟ - أكثر من هيك، شو متوقّع منّي إنو اخترع؟! (صمت مديد)

موعيس: (بعد مساعدته زيرفو في الاستلقاء على السرير، يُجر نفسه على كبح الغضب الذي يتملّكه ويقترّب من تيكولا) إذا بتريد فيك تجاوب على سؤالي يا تيكولا؟؟ عم بسألك إذا سبق وشفّت هالجريده!!

تيكولا: (بمراة، وبسرعة) إذا جاوبت إيه، بشو رح يفيدك الموضوع؟؟ شو رح تحقّق إذا قتلتك إيه؟؟ (يتحرّك إلى يمين مُقدّمة المسرح، مُدخناً، ويقول بغضب) شوف يا خبيي، إنت سبب كل هالشي!! (وإذ يتوقّف موعيس فجأة، يبدأ بالكلام على نحو أسرع، بثقة متزايدة) شوف يا خبيي، إنت لغز!! إيه، إنت قصّة بتحير!! إنت نكتة بتبدا حكايتا الصبح مع طلوع الضو وبتكمّل لوقت النوم بالليل!! إنت أنسب موضوع للجأجة والنمنمة بين الجيران بكلّ المنطقة، بين رفقاتك بالمكتب، بين يلي عم يشربوا القهوة، فنجان ورا فنجان²⁰ إنت نكتة بيحكوها لبعض بساحة البلد، بكلّ المدينة، من شرقها لغربها!! إيه!

²⁰ في العادة شرب القهوة في أثيوبيا يفترض صبّ الفناجين لثلاث دورات.

مَرْسَخ

إيه! إنت نكتة الكلّ بيحكوها، بيسمعوها، وبيتناقلوها!

(بتقدّم موغيس بسرعة نحو تيكولا ويصفعه. في تلك اللحظة لا يعرف تيكولا ماذا يفعل ويبقى صامتاً مثل جثة. يهدأ روع موغيس قليلاً ويُنازعه الندم فيما يتقدّم نحو المقعد ويجلس عند طرفه، رأسه مطأطأ. يتكوّر حول نفسه في أسي. ويضع في الأفكار. تيكولا يراقب موغيس، يتنفّس بثقل وبانفعال يختلط فيه الاستهزاء بالعبث، يشرف على الضحك لكنّه لا يلبث أن يغرق بالأسى والنشيج المكبوت. يعلو من الخارج صوت خطوات راكضة. يفتح تيكولا الباب وينظر إلى الخارج ويرتدّ خائفاً. يمكن سماع صفّارتي شرطة. موغيس وزيرفو الخائفان يقيان صامتين. وفيما يندفع تيكولا نحو الجمهور محاولاً الهرب، تنخفض أضواء المسرح وتُثار أضواء البيت. وفيما يلقي رجلا شرطة القبض على تيكولا ويقتادانه إلى الخارج، تنطفئ أضواء المسرح والبيت بسرعة).

المشهد 2

الساعة التاسعة إلّا ربع صباحاً في اليوم السابع. نسمع ضجيج المازة المعتاد، أصوات خطّي، هدير سيّارات وزعيق زمامير. زيرفو يغطّ في النوم.

موغيس: (ترتفع الأضواء فيما ينهض من السرير، يرتدي كامل ثيابه ما عدا المعطف وفردة حذاءه اليسرى، يجلس عند طرف السرير ويسرّح شعره. وفيما يسرّح شعره ويرتدي معطفه وحذاءه، يبدو في حالة بائسة وسارح الذهن. يفقد تركيزه بين فينة وأخرى، ويتوقّف عن الحركة. وإذ يحرك يديه ورجليه يبدو ذلك بفعل العادة لا الإرادة. وحين ينظر إلى الساعة ينتفض خائفاً، وحين ينتبه إلى أحد أعقاب السكائر التي تركها تيكولا متناثرة هنا وهناك، يقف ويلمّها ببطء عن الأرض. إنّها قطع صغيرة يكفي ملقط صغير لالتقاطها، الرماذ المتبقي أكبر حجماً من العقب بأكمله. وما أن يلتقط واحد

مَ رَسَخ

منها، يسرح في الأفكار ويجلس عند طرف السرير، ساهماً. وهو ساهمٌ وسارحٌ في أفكاره، يلتقط عقب السيكرة بين أصبعيه ويتساقط رمادها على الأرض ويتناثر. ويبدأ بالدمدمة فيما يراقب بقايا السيكرة وتناثر الرماد في الهواء، وكأنه يحدث شخصاً يتصوره أمامه).
تغيّرت كلّ طباع تيكولا بهالأيام السبعة، كان الواحد بيكفي ينادي إسمو حتّى يخلّيه يعصّب، ومبارح بالسجن كلّ الوقت كان راسو مطاطي وناداني «غاشاي». بسبع تيام، فتوة الثلاثة وعشرين سنة همّدت، وصار ختیار عمره تسعين سنة. هُوِي يَلِي كان يفتش على الدم بسّ تشخّ المي، صارت عيونو برفع الإبرة وقلبو صار ما عم يستعملو إلا للفحوص الطيئة. قبل ما ياخذ أي نفس، حتى لو كان نسمة صغيرة، بيتردّد، وبيفكر وبيفكر. سَماني «غاشاي». وسألني، «قولك لعنة بيّنا حلّت علينا؟» ما قدرت فكرّ بجواب وتشوّش ذهني. قتلو لمنّ العذاب بيجزبنا، دائماً تجربتو بتكون شريفة. (برهة صمت)
قلّي، أحلامي تغيّرت بهالأيام. يحلمّ باتجاه الداخِل مش الخارج. وشرجلي إنو، لمن بيزعل، أو بيعصب أو بيكره شي، هالشي ما بيكون إلا حالو. لمنّ قال، إنو ما عاد في حدا تاني بحياتو تيغضب عليه لمن بيكره شي وإنو هالأمر نوع من التخلّي عن العالم، أنا كمان حسيت بالحيرة. (برهة صمت) لمنّ صار يتطلّع سارح بأفكارو، كانت العروق بجيينو معلّمة كأنها كدمات بعدها ما بردت. ولمنّ بيطلّع بنظرات محدّدة، بيّن البوبو جوا عينيه قد البحصّة الصغيرة، بحصتين مخترقين جمجمتو مثل شعاعين صغار من نور شقّوا السقف. بهالعالم الغريب، خيّي يَلِي عاش بالطول والعرض وانجر ورا حياة السوء هلّق كبر بالحبس. هالتيكولا يَلِي دائماً كان يقلي ليش إنت هون بدل ما يقلي أنا سعيد إنك هون، ناداني هلّق «غاشاي» وراسو منحي. بعتمد إني شفت شخص ظاهره كان غرقان ببحر من السوء، وجواتو معقّن، لكنّو مبارح نضح من جوا، وضلّت ظاهرة من برّا جروح المعاناة. الشباب الضايح يَلِي سمّم تيكولا، ظهر مبارح بمظهر رجال كبير بينصح الآخرين من التجربة يَلِي تعلّمها من عمرو. تيكولا تغيّر. خيّي يَلِي ضل يهرب من رأي الناس التانيين... (عندما دقت الساعة التاسعة صباحاً وتناهى صوت المنبه من المشغل القريب، يستعد، ينهض، ويمشي بسرعة كأنه سيغادر، ثمّ يجلس إلى جانب سرير زيرفو) ... آبيي،

مَ رَسَخْ

آبي، أرجوك فيق، كول شي، عالقليلي تغرغر بالملي! (فيما يتناول قنينة المياها عن الطاولة، يأخذ قطعة الخبز الموضوعة على الطاولة والملفوفة بجريدة ويضعهما عند أسفل سرير زيرفو) يلاً، ارفع حالك، إذا نمت عليه (على المرض)، بينام عليك. اليوم، مش مهم من وين رح إذّين المصاري، ما رح إرجع إلّا ما كون اشتريتلك دواك. (مصحّياً إياه) يلاً هلق، قوم. (وفيما يرفع زيرفو نفسه لاهتاً من الألم، يغادر موغيس مسرعاً).

زيرفو: (ألمه لا يكلّ، يثقل عليه. وبعد جهد حثيث، بعد أن ينجح أخيراً في رفع نفسه، يخرج نفسه بصعوبة وهو يصلي ويتكلم). إنت أخبر، إنت أخبر، إنت أخبر (بنبرة مثرثرة) لمن بتوسلك، بتضلك عم تراوغ. بقلك خدني من هون، بتقول لاء، بقلك تركني لوحدي، بتقول لاء، ما بتحلّ، وما فيي زحك. بعتمد هلق صرت ختبار وبطيئ، يا ابن مريم. لهالدرجة تدهورت علاقتنا، لمجرد شكاوى مش مسموعة من مرة ختبار، لمجرد تدمر. وإنتي، ليش ما بتقوليلو يوقف، يا مريم النور؟؟ لمن سألتو يخلي هالولاد يستحقوا ورتة بيون، خلّا واحد ممن يختنق هؤي وواقف، والثاني يفوت عالحبس، وبعدها تجاهلني.

(تمرّ فترة قصيرة من الوقت بينما ينشج من الألم، بعدها وكأنّه يصلي) يا ابن الله، استجبنا، يا ابن مريم، استجبنا، يا رب، استجبنا، الرب يلي بسط الأرض ورفع السما بلا عمد، إنت أعلم. إنت أعلم العالمين. (يبدأ بالتناوب لكنّ الألم يعظم فيوقفه ويغدو جامداً). خلص، ما تبكيني عليك، خلص، خلص هالشي ما بيسوالك، خلص، صراحة لازم تكون عم تساعدني لإتحضر لموت بعد الإعراف، وإذا ما بدك تساعدني، تركني وروح، خلص يا ابن مريم، خلص. خلص يا إمّي، خلص... أرجوك ما تخلي هالولاد يبعدوا أكثر عن ورتة بيون، هالشي بيكفي. ما تخليهن يهربوا من الوسخ الأسود، بيكفي. حرري هيداك من الحبس، وهيدا من عيشتو المخنوقة، ودليهبون على ورتة بيون. دوقيهون طعم الحصاد، المحاصيل، والوسخ الأسود... صباح الخير يّلي هونيك... (عندما يرفع صوته كي يلقي تلك التحيّة، يقطعهُ الألم فيصمت. وعلى الفور إذ يستعيد نفسه، يطلع صوته وسط صفير الأم)

مَ رَسْ خُ

مَن هالأرض البكر بتنادي، لَبِّي النداء والعرق على جبينك..
 رَحْم الأرض مشرّع والثمار محروسة والزرع يكون عم ينما..
 يَلِّي إلكن الأرض السمرا! يَلِّي إلكن الجنى والمحاصيل!
 الأرض كانت متروكة بلا عِترة، الأرض كانت ناطرة مين يحرثها..
 المطر أَجج النار، الشمس دَوبت الشحم بكل شي، العشب خنق الثمر..
 وأنا بعدني عايش، ليش حتّى كون عقيم، ما دامني ما بستاهل الموت بعد الاعتراف؟
 إذا البذور موجودة، وين ممكن نلاقي مين يهتم بالزرع؟
 إذا القطيع رجع من المرعى، مين بدو يستقبلو؟
 مين بيفتح بواب الحظيرة؟
 مين بيحضّر طبق الزبدة؟
 مَن رزق البشر بيوقع بأيدين الوحوش!
 مَن ورتة الأب بتنهمل، مَن ما بعود في حدا يهتم بالجنى!
 مَن ما بيلتقى حدا بيدد الإهمال!
 آخ يا هالقدر الملعون!
 مَن بيغيب صاحب الرزق، الأرض بتقلب صحرا!!
 ما تخليها هيك!! ما تحوّلها لهالحوالة!!
 (يقطعه الأُم والأفكار)
 مهما بكى الطفل بوجع وصار الأُم يوخزو بسقف حلقو

مَ رَسَ حُ

رح يقولوا لأنو شاف قدرو الأسود من لحظة ولادتو...

رح ضل حكاية، من دون ما ابلغ عمر إني جيب ولاد..

رغباتي رح تتبخّر مثل الغيوم..

آمالي رح تسقط مثل الأطلال..

ومعها آمال ولاد خيي، يلي ما حضّرتن مزبوط ليتولّوا ورتة بيّون..

(يوقفه الأم، فيصمت، وعندما يستعيد نفسه فجأة، يغدو صوته ضئيلاً، فيئنّ بصوت

ضعيف. تتراجع نبرته أمام تعبها البالغ، وبالكدّ تُفهم كلماته).

حتّى لو، حتّى لو كنت بشبه الأرض..

الأرض يلي عم بتموت، صديقي بناديني الميّت..

إذا شافني بشبه الأرض..

شو همّني إذا كنت بشبه الأرض!؟

لمنّ بعد ما خلقتني، وعطتني الغذاء حتّى أكل، التهمتني..

حتّى لو، حتّى لو كنت بشبه الأرض..

(وفيما يئنّ، يأخذ قطعة الخبز الصغيرة التي تركها له موعيس وإذ يحاول رفع قنينة المياه

تسقط من يده وتندرج تحت السرير وتتناثر المياه في الأرجاء. يفقد الأمل، يستلقي إلى

الخلف ويتابع همهمته، التي يزداد اختلاطها بصفير الأم. وفيما تتصاعد زفراته ويتلوّى

من الأم، تتباطأ همهماتة، ثم يدخل موعيس مندفعاً ومعه مغلّف قديمّ وقطعة ورق

مهترئة مكتوب عليها أمر ما، وبعد لحظات، وباستهتار وهو تائه بالأفكار، يستلقي عند

طرف السرير ويبقى هناك).

موعيس: (سرعان ما بيتسم، يلتفت إلى زيرفو، وبنبرة فيها شيء من السعادة والاستبصار)

مَ رَسَخ

أبي، شفت الرسالة يَلِّي بعثها تـ. - تيكولا من السجن؟ ... جيت بسرعة عالييت لحتى
 اقدر اقرالك ياها. هيدي هيِّي. هيدا المكتوب فيها. «إلى عمِّي، أبي زيرو وإلى أخي،
 غاشاي موغيس بيتنا... كيف حالكم؟ طمَّني.. تحسَّنت حال أبيي؟ أنا بخير. بحفلكن،
 عم قول الحقيقة... أنا بخير. متل ما بتعرفوا، كل يَلِّي أنا معهن هون استهلكوا حالن
 بالمدينة، متل ما أنا عملت، وبطلوا يصطنعوا شي. الواحد بيقدر يطَّلِع ويشوف جرح
 يَلِّي مقابيلو. لمن بتكون سرقة الحرامي مكشوفة، وواضح كيف شاهد الزور كدَّب وخلا
 الشخص الخطأ يتعاقب، وكيف النصاب احتال على الناس وخذعدهون، ما حدا عندو شي
 يخيبه. ومتل ما قلت، صرت عم شوف هالمكان مدرسة للمعاينة أكثر متو بس سجن.
 وعم بتأكد أكثر إنو معاناتهن هيِّي معاناتي، وإنَّو جروحن هيِّي جروحي، وروايجهن هيِّي
 روايحي. من اليوم الأول وقت يَلِّي حلقولي شعراقي وانضميتن وضربوني وطلبوا متي
 ابزق المصاري يَلِّي مخبيها لأشترتي شمع²¹، حسَّيت بحقد كبير تجاهن. بس مع الوقت،
 لمن صرت شوف وسخ روحي معكوس ميرايا عيونن، بعثتد إنَّو مرارتي تلاشت. في خبر
 حلو لأبيي! قَلَّو إنَّو إيدي يَلِّي ما عرفوا إلا كيف يشدَّوا على السكنين، صاروا يعرفوا هلاً
 كيف يتواضعوا وتعلَّموا يشتغلوا بالأرض. قَلَّو إنَّو حرثت قطعة أرض صغيرة وبلشت
 أزرع بصل وإهتم بالخضرة. خبرو إنَّو رح بلَّش إتعلَّم متلك (مثل زيرو) يَلِّي سميتها
 موهبة أنو تحني جبينك لوسخ الأرض، الشغل بالوسخ، ورفع الوسخ، وينشغل بالي على
 النبات يلي زرعتو، وإذا كانت العروق عم تنما أو ما عم تنما، وإذا الأعشاب خنقتهن أو
 لاء، وإذا الشمس غابت، وإذا كانوا عطشانين بدَّن يشربو... يا غاشاي، يمكن ضل أنا عبد
 للمرارة، متل ما كنت دائماً. يمكن ضل إجهل هويتي وإبقى سكران بعتمة الكوايبس. بس

21 لأن إضاءة الفوانيس بالسجن لها برنامج صارم ومحدَّد، يسعى السجناء إلى تجميع مخزون من الشمع للإنارة في وقت يتعدَّى البرنامج.

مَ رَسَخ

يا غاشاي، بعتمد إنو الفكرة رح تخليكون، إنت وآبيي خصوصاً، تفرحوا شوي إذا عرفتوا إنو إيدي رح تتعلم نزع الوسخ، وإنو شحات إيدي رح تختلط بالوسخ، رح إتعلم العناية بالزرع ولها السبب عم إكتيلكون. مين بيعرف، يمكن بس إطلع من هون، روح أنا وآبيي لأرض بينا ويمكن إتعلم أكثر عن الوسخ وطعمتو... بس، وكونن قالوا إنو الحكيم بمستشفى دغماوي مينيليك وقّع إفادة بتقول إنو حالة الرجال يلي طعنتمو بعدا حرجة، فيمكن ما رح إطلع من هون أبداً. معقول إنكن كمان ما سمعتوا عن هالشي؟ - أو إنكن سمعتوا وخبيتوا الخبرة عني لأنكن فگرتوا إنو هالشي ممكن يشغلي لي؟ (يغص موعيس بالدموع ويبقى صامتاً لبعض الوقت ثم لا يلبث أن يتابع القراءة) بالنهاية، خلينا نتمنى إنو نكون مستحقين نقابل بعض من جديد، وقول لآبيي انشا الله يصير أحسن. خبرو شو قلت، يمكن إذا ضهروني، رح نترك هالمكان سوا.» (بعد هنيهة صمت، يكبح آخر نوبات الحزن ويستبدلها بإحساس سعادة متصاعد) طيب يا آبيي، ليش منك مبسوط؟ ... عم يقول إنو تعلم كيف بيكون طعم الوسخ بيت المعاناة هيدا... عم يقول إنكن رح تروحوا سوا على أرض أبابا... (يقرب قليلاً من زيرفو) آبيي. (يقرب أكثر إلى سريره) آبيي. (يزيح الغطاء على مهل) آبيي... آبيي!! (مذهولاً بمفاجأة كبيرة، يبقى في مكانه، فمه مفتوح. بعدها مباشرة، يتوجه إلى الفتحة الصغيرة في الجدار، ينتزع قطعة البساط، وينشج بالحزن، بصوت عال) آ - آتو تيليل، آ - آتو تيليل!! آ - أرجوك، عد. عمي إجا من الضيعة ليتعالج من المرض ووم... مات، فيك تخبر الناس بلجنة الحي أو الإيدير²²، حتى يساعدوني بالدفن.

(سعال تيليل بالكاد يُسمع. يتوجه موعيس إلى سريره والخوف ما زال يتملكه، مُرتجفاً ينتزع الغطاء الأسود عن السرير، ويلفّه وهو يرتجف حول جسد زيرفو. يرتجف وأسانه تصطك، ويعود إلى المقعد، يجلس حزيناً متكوراً حول نفسه. يتناهى من الخارج صوت

22 الإيدير: لجنة أو رابطة في الحي، كل عضو فيها يدفع مخصصاً شهرياً، فحين يموت شخص من عائلة أحدهم مثلاً، يأتي أفراد اللجنة للمساعدة ويسدّدون كل تكاليف تحضير الدفن والكفن والقرّب وتدابير العزاء بعد الدفن، فيستى لأهل الفقيد تدبّر أمورهم مهما كانوا فقراء.

مَ زَسَ حُ

أفراد من لجنة الحيّ في غولا، يطلقون الأبواق والأصوات لإعلام الناس وتنطفئ الأضواء على مهل).

المشهد 3

بعد دقيقتين، حين تعود الأضواء على نحو بطيء، لا السرير ولا الجسد الذي كان ممدداً عليه زيرفو في مكانهما.

(من الخارج، وفيما أعضاء لجنة الحيّ في غولا يقدمون تعازيهم لموغيس، «الله يكون في عونك، كن قوياً، أزرِك الله، ثبّتك بقوّته»، وفيما موغيس المنهك يجيب، «آ - مين ... آ - مين ... آمين ...» تخفت الأضواء على مهلٍ ويتضاءل صوته إلى أن يغيب).

انتهى



AFAC ARAB FUND FOR
ARTS AND CULTURE
الصدوق العربي
للثقافة والفنون

مسرح
ensemble
Theatre and audiences together
masrahensemble.org